

१६१

दर्ता नं.: ४८/२०७६/७७

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



नेपाल संवत् १९४५ दिलागा: / २०८२ साउन १ / 2025 July / ल्या: १३५, दौ: ७



खण्ड नगरपालिकाया

हिंच्याकगु नगरसभा कथचाल

स्वप नगर प्रमुख प्रजापति जु नपांया पुचः धुलिखेल अस्पतालय् स्वः भाल
(२०८२ असार १७ गते)



स्वप नगरपालिकाया न्यायिक समितिया ज्या इवःत निरीक्षण
(२०८२ असार २७ गते)



; Dkfb sLo

@)*@ ;fpg !, c^s !^!, jif&

छुंहे उपलब्धी मजूगु सरकारया थुगु दाच्छि

प्रजातन्त्रया मूल्य व मान्यताया अखः संसदया न्हांगु दल नेका व नेगुगु दल एमालेया दश्वी छगाथि चिडः सरकार निःस्वांगु नं दाच्छि फुत । एमालें माओवादी नपांया गाथि चां चां हे फ्यडः २०८१ असार १७ गते नेकानपां न्ह्यगू बुँदाया सम्भौता याडः असार ३० गते के. पी. ओली प्रधानमन्त्री जूगु खः।

संविधान ल्हवनय्गु, सुशासन, भ्रष्टाचार नियन्त्रण, राजनैतिक स्थायित्व थजगु न्ह्यगू बुँदा तयो सहमति याडः दयकगु सरकारं दाच्छिखय थव सरकारं छुं हे ज्याखय् छुं हे सुधार हयमफू । संविधान संशोधन सरकार निः स्वांगूया मू मुद्दा खः । थुगु इलय संविधान संशोधनया खाँ न नेका नं छुं पिकाला न सरकारया न्ह्यलुवा जुयो च्वम्हा एमालें । संविधान संशोधनया खाँ सरकारय् वानय्गु छपू स्वन्हचा थें जक खः धाय्गु अः सिय दत ।

नेका व एमालें नेदा नेदा पालं प सरकार चलय याय्गु सहमति खः । देशय् छुं नं लागा हज्यागु खानय् मरुसेलिं दश्वी सरकारया न्ह्यलुवा हिलय थम्बें धायो के.पी ओलीं दाच्छि लिपाया प्रधानमन्त्री 'शेर बहादुर देउवा' जक त्वाप्व मदिकक हाल च्वंगु दः ।

कृषि प्रधान देशय वापिज्याया इलय देसि सः मदयो हाहाकार, किसानत ८-१० किलो सःया लागिं न्हिच्छि लाइन च्वडः लिभालय क्वयक च्वनय मःगु व सःमतःसिं वा पिय मःगु दःसा, नाः छुयगु बांलागु व्यवस्था मरुगुलिं मर्से (तराई प्रदेशय्) व मवयो मदेश प्रदेशं सुक्खा क्षेत्र दक क्वः छिय धुकल । ल्यासे ल्याम्हो विदेश वाडः च्वंपुं भन अपः जुयो च्वंगु दः । जनशक्ति मदयो नं बुँ ज्या बांलाक याय मफयो च्वंगु दः । अथे धाय पहाड व तराईया अपलं जग्गा बाँभ हे जुल ।

त्रिभुवन विश्व विद्यालयया उपकुलपति, रजिष्ट्रार व रेक्टरया क्वथात तालं ग्वयो तःगु दः । फुकक धाय्थें कलेजत अखय स्व थखय् स्व मरु । ब्वनामिपुं थःगु देशय् सं ब्वनय्गु स्वयो विदेशय् ब्वं वानय्गु मति तयो जुगू दः । दायें लाखौं ब्वनामिपुं विदेशय् ब्वं वाडः च्वंगुलिं नेपालया डासगू स्वयो अपः कलेजत तिय मालिगु खानय् दत । धात्थें धाय्गु खःसा शिक्षाया लागा ख्यंयो वाडः च्वंगु दः ।

बजार भः थिकय जूगु पानय फःगु मरु । बञ्जतय्सं थमनं यत्थें तःगु भःखय् जनतां न्याय मालः च्वंगु दः । ल्वाक छ्याड मिडगु सामान, मभिगू सामान व म्याद फुगु सामानत मिडपुं बञ्जत अनुगमन बांलाक मजूगुलिं छतिं हे मग्ग्यासीं मियो च्वंगु दः । गुकिं जनताया स्वास्थ्यखय यत्थें म्हेतः च्वंगु दः ।

स्वास्थ्य लागाय् सरकारया नियम काथं बीमा सुविधा बियो च्वंगु अस्पतालं दां दां तकनं बीमाया धेबा काय मफूनि । अस्पतालं जनतातय्ता बीमा सुविधा मबियो हय धुकल । चर्को चर्को खाँ ल्हासां सरकारं थमनं बियागु बचं काथं छुं नं ज्याखय् बांलागु लिचवः बिय मफ ।

भ्रष्टाचार न्हियान्हिथं अप्वयो वाडः च्वंगु दः । मन्त्रीतय्सं तप्यंक हे घुस काइगु घटनात प्याहाँ वयो च्वंगु दः । अख्तियार व अदालतया कारवाहीखय पक्षपातं हाँ कायो च्वंगु दः । थुकाथं सरकारया दाच्छी संविधान संशोधन, सुशासन व भ्रष्टाचार पानय्गु नपां मेमेगु विकास निर्माणया ज्याखय् भन भन लिचिलः वाड 'उपलब्धी मरुगु दाँ' जुयो च्वंगु दः।

पिकाक-खप नगरपालिका/सम्पादक-आशाकुमार चिकंभञ्जार, डेस्कटप-धन लक्ष्मी त्यात, आवरण सज्जा-रेणु ध्वज, थाकू- भक्तपुर अफसेट प्रिन्टर्स फोन ल्याः ०१-६६१३०४३, ई-मेल- khwopapau@gmail.com



डायरी

नारायण मान विजुवछें (हरिबहादुर श्रेष्ठ)

शम्भु प्रसाद तिवारी मरुनुं खुला दत । वयक छम्हा नगरया समाजसेवी खः । थमनं हे ब्वडः सयकः, थुइकः सुसंस्कृतम्हा मनु जुगुलिं वयक थः चवडाथाय् ब्वनयकुथि, कलेज, साफूकुथि, स्वास्थ्य चौकी थी थी संघ, संस्थात चाय्केता तःलाक जुला । समाजया नितिं वं थ्यं मथ्यं स्वीदाति निसें मनसिं सेवायाता ।

व संस्थात निःस्वानयता वयक, नाता-गोता, जलाखाला, गां अलय सरकारया मनूत म्हास्यूपिन्थाय् फुक्क सिया छें छें भाला । वयकलं श्रमदानया नितिं, चन्दाया नितिं, मुंकायता, सरकारकय् स्वीकृति कायया लागिं शिक्षा कार्यालय, शिक्षा विभाग व मन्त्रालय नपां थी थी कार्यालय नं भःगु खः । लाँ दय्केता, बिजुली मता हय्ता, तार टेलिफोन अलय त्वनयगु नाः हय्ता अपलं दुःख सियो दिला ।

म्हेगः तिति जक बुपुं न्हुगु पुस्ता शिक्षित जुल, स्नातक व स्नातकोत्तर तर्गितक ब्वपुं ल्यासे ल्याम्होपुं खानय दयो वल । गां छगू नमुना बस्ती जुल । गां व बस्तीया फुक्क चिच्या हांपुं तः हांपुं फुक्क सिया वयक शम्भु जेठाबा, शम्भु काका व शम्भुदाइ जुयो म्हासिइका पिब्वयो जुल ।

अथेहे दाच्छि नेदा हों निसें शम्भूया ख्वः चमकां, औसिया चा थें, सुपार्यचां भुंगु सर्गथें ख्यंयो वांगू फूक्क सिया मति वान ।

गुम्हासिं छुजुला काका ? छू जुला दाइ ? जक न्यनिबलय वयकलं 'फुक्क पाय्छि हे जु । संसार थथे हे खः ।' दक लिसः बिइगु । गुल्लें गुल्लें वयक याकचा च्वडः च्वनिबलय ता ता हाकः भःस्कः तैगु अलय वयकया ख्वालय छुं पिज्वय मफूगु भावत दुबिडः च्वंगु मति परिवारया दुजः पिसं नं मयागु मखु ।

शम्भुप्रसाद मदय धुंकः व गां अलय बस्तीसं छगूकाथं सुनसान थें जुल । ब्वनयकुथि, कलेज व साफू कुथि, स्वास्थ्य चौकी थजगु संस्थाया हामा, नायो व चन्दा दाता थजगु पदत प्वन । खाली जुल ।

व म्हाय् पुसे च्वंगु पहः तांकयता समाज सेवीपिनिगु बैठकं शम्भुप्रसादया काय् सुरेन्द्र प्रसादता वया अबुया पदय तयगु मति तल । सल्लाहं क्वः छ्यू काथं ब्वनयकुथिया सञ्चालक समितिया सदस्य सचिव राम बहादुर श्रेष्ठ कलेजया दां भारी कृष्ण थापा, साफूकुथिया न्वकु बिनोद केसी व स्वास्थ्य चौकीया सञ्चालक समिति (ज्यासना पुचः) या छ्याञ्जे संगीता कुसी वयागु छें वान ।

सुथायसिया ९:०० ता इलय, सुरेन्द्रप्रसाद बर्खी वसतं फियो छें या पिलिचाय लिभः पापां न्हिपौ स्वयो च्वना । संघ संस्थाया पदाधिकारीपुं वयकया पिलिचाय् थ्यंकः बिचः वयागु खाँ नपां गथे खः छु खः दक न्यनय् कानय् यात । नपां आना तयो तःगु मेचय फेतुत ।

सुरेन्द्र शम्भुप्रसादया तः हिम्हा काय् खः । व छगू बैडक याय्म्हा मेनेजर खः । व अपलं यें देशय हे च्वनिम्हा खः ।

इष्टकोट फियो, तपुली पुयो तःम्हा खुड्दातिया राम बहादुर श्रेष्ठ खाँ छु छु न्यन - सुरेन्द्र भाइ, छि ब्वां थव गां व बस्ती विकास याय्ता तहांगु योगदान याडः वान,

व जिमिसं गुल्लें हे लुमांकय् फै माखु । मनु जुयो जन्म काय घुसेलिं छन्हू नं छन्हू भी फुक्क वानय हे मनि । न्ह्याब्लें गुण याडः च्वनय नं फैमाखु । भिम्हा ब्वाया भिम्हा काय दक छिता जिमिसं म्हासिइक वयो च्वडा ।

कोटपाइन्ट फियो वम्हा अथे हे स्वीडादातियाय्म्हा कलेजया दांभारी कृष्ण थापां ताँ ताँ धाल- 'छि ब्वा नं याडः भःगु योगदान लुमांकय् बहगु खः, ब्वाया अजगु ज्यायाता काय भाजुं डाल हज्याय्गु छगू काथं धर्म हे खः धाय्गु मतिं जिपुं थाना वयागु । समाजय् छम्हा मनुयाय् नं उलि हे महत्व दै । छि ब्वाया न्हयलुवाय हे जिपुं थुगु थासय् विकासया ज्या हज्याक वयागु खः ।' सुरेन्द्रया जहानं चिया हयो सकलें विचः वपुं पाहां पिन्ता बिल ।

साफू कुथिया न्वकु छम्हा ल्याम्हो चाम्हा बिनोद के सी खः । ब्वनयगु च्वयगुलि तःलाम्हा जुगुलिं नीडादाया ल्याम्होचाम्हासिता उगु पदय तःगु खः । वं धाल - सुरेन्द्र दाइ छि ब्वा पाखं जिमिसं यक्व सय्के धुन । भीगु साफूकुथि सत्याम्हा स्वयो अपः दुजः पुं दः । न्हिं डयम्हा दुजः पुं व पाहाँत आना ब्वनयता व छें ब्वनयता साफू कः वैगु । साफू कुथियाडः हे ल्यासे ल्याम्होपिन्के साहित्य व मेमेगु लागाय नं ब्वनय मन दयकः वगु खः अजगु खाँ तब्ब्याडः नं वांगु दः । थुकिता अज बांलाकः न्हयाकतुं यंकय् मः गुलिं सुरेन्द्र दाइ हे थुकिता हामा जुयो दियता इनाप याडा । थव जिगु जक प्रस्ताव मखु । साफूकुथि सं ब्वा मदय धुंकः थव विषय तःकः हे छलफल जगू खः । थाना च्वपिनिगु मति नं वहे खः । दाइ नं जिमिता ब्वा नं थें न्हयलुवा जुयो ग्वाहाली याइ धाय्गु जिमिगु विश्वास खः ।

सुरेन्द्र छसः हे मतः । नुमवासे जक चवडः चवना । वया खवः खू । दश्वी दश्वी भसूक तःगु फुक्कसिनं मचःगु मखु ।

संगीता कुसी नगरया छम्हा नर्स खः । व स्वास्थ्य चौकीया ज्यासाना पुचःया छ्याञ्जे नं खः । स्वीदाया मयजु कुसी महिला ज्या इवः लय नं जुई । वं नाइक धाल - सुरेन्द्र दाइ श्व स्वास्थ्य चौकी भीगु गांता अस्पतालं थें हे सेवा बियो वगु दः । शम्भु ककां याडः हे जनतां अःपूक स्वास्थ्य सेवा का कां वगु खः । उकिं स्वास्थ्य चौकी व स्वास्थ्य सेवा न्याकं तुं यंकयता छि हे हामा जुयो न्याकिगु आशा याडा । श्व स्वास्थ्य चौकी सरकारं दयकः ब्यूगु मखु । शम्भुककाया परिश्रमया लिचवः खः । वयकलं जनताया छैं छैं वाडः चन्दा कायो पलिस्था यागु खः ।

सुरेन्द्र पलखः कप क्वछुडः बिचः याडः चवन अलय 'पलख न्हि' धायो लाहा भाय याडः छैं द्रहं वान । २-३ मिनेट लिपा छगू टिपोट कायगु कापी ज्वडः प्याहाँ वल । उगु कापीया खोल (गाता) ख्वातुगु खः । व शम्भू प्रसादया डायरी खः । डायरीया दश्वी दश्वी भवँ क्वचा तयो चें तयो तःगु हे दः । सुरेन्द्र प्यम्हासितां छपुलु छपुलु याडः स्वयं धुकः चवयो तःगु कापीया पाना पुइक धालः- 'श्व अब्बाया डायरी खः, थुकिता ब्वाया इच्छापत्र धःसां पाइमखु । नेला हौं अब्बाया दराजय लुइकागु, श्व जिं बवनय धुन । थौं छिकपिन्ता नं ब्वडः न्यंकः क्यनयगु पाय्छी ताय्का । सुरेन्द्रया सः भाति खा खा तु । वयागु ख्वालय खू भू चिन्तां जः अलय अजुगतिं जः ।

डायरीता संगीतापाखय घ्वा घ्वां चेंत कयं कयं धाल-संगीताजु छिं श्व पाना ब्वडः न्यकः दिसैं ।

संगीता डायरी ब्वडः न्यंकल बवनयकुथि निः स्वानय धुकः डादा प्यादा लिपा मास्टरपुं थ वं थवय हेडमास्टर जुयगु खायँ ल्वापु थः सेलिं, थः दाजु किजापुं योग्य

मजूसं मास्टर यायगु स्वसेलिं, स्कूलया सहायकपिसं चक, डस्टर व घडी (ईलचं) नपां छैं यंकः सेलिं, हिगुफाइल न्याडः नीगूया बील दयकेवं, अलय जिल्ला शिक्षा कार्यालय चाकडी-चुक्ली याडः घुस नकः अयोग्यपुं मास्टरत स्थायी जुयगु अनियमित ज्याखय जुयवं अलय बांलापुं, भिंपुं, सःपुं शिक्षकपुं स्थायी मयायगु व बहुवा मयायगु ज्या थःपुं शिक्षक पिसं हे यासेलिं जिता तस्कं दिक्क जुल ।

संगीतां मेगु चें तयो तःगु पाना पुइकः ब्वडः न्यंकल कलेज चाय्कागु डादा दुनय हे स्वसम्हा स्वयो अपः ब्वनामिपुं दता । परीक्षाया लिचवः तस्कं बांला । जलाखाला अथे धाय् थिइक निजी कलेजत निःस्वासेलि आना थखयति ब्वनामिपुं मरु । कलेज चाय्कागु न्हयदाया दुनय डास स्वयो अपः ब्वनामिपुं दत । निजी कलेज याय् पिसं भिगु कलेज याय्म्हा प्राचार्यता लच्छिया स्वीद्व तलब बियगु अलय मेपुं बांलापुं प्राध्यापक पिन्ता लय नीद्व-नीडाद्व तलब बियगु याड कायगु ज्या याता । चिच्या-हिल्लय निसैं भीसं हे ब्वंकः योग्य याडः हर्कय याडापुं व ल्यासे ल्याम्होपुं धेबाया तिंतिं थःगु कलेजता अलपत्रयाडः त्वः त वांबलय जि आतां हे जुया । न्यडाबलय अमिसं धाला - थःगु कलेजय ई काथंया जिमिता तलब मब्यू अलय न्याबल्लें जिपुं च्यो भ्वातिं जुयो छगूतुं कलेजय ज्या सानय नं फै मखु । शम्भु तबां थें समाज सेवाया नामय जिमिसं त्याग नं याय् फै मखु । संगीता छक छुयाय् छुयाय् जुइक वाताहाँ चवन मेपुं नं वं वयागु व वयागु ख्वः स्वयो चवन ।

संगीतां मेगुपाना बवन - स्वास्थ्य चौकी वगु भिगु व थिकयगु वास बिरामीपिन्ता मब्यूसें पसलय मिय यंकगु सियानिं जिता तस्कं हे चित्त दुखय जुल । बांलागुमतिं पिडागु सिमाय् बांलागु हे फल सैगुमति तयागु तर लिचवः अखः जुल । गुब्लें गुब्लें जिथमनं हे समाजसेवा याय् मसयागुला वा थमनं मेपिनिगु

भाय मथुयागु खःला ? अथे थथे हे धाय मफया ।

फुक्कसिनं छक वं वयागु ख्वः चूलाकः स्वतः । सुरेन्द्र न्वमवासैं फुक्कसिया मनया भाव ख्वालय स्वयो थुइकः चवना । संगीतां मेगु पाना पुइकल अलय-बवन बवनयकुथिया पदाधिकारी पिसं बांलागु साफु त दर्ता मयासें थःगु छैं यंकल । बांलागु अंग्रेजी व नेपाली भाय्या खाँव धुकुत, अलय थः काय म्हायपिन्ता ज्या लगय जूगु साफूत छैं यंक गुब्लें हे लिता महः । न्यागुं थासय् ज्यूम्हा-मज्यूम्हा, फःम्हा-मफःम्हा थः थःपुं मनूत दुथ्याकय तानिगु, धेबा कायता जुइगु, अलय थः वं थवय ल्वाइगु पहलं जिता इलय ब्यलय समाज सेवा याय्गु लौपु त्वःत वानय मालिगुला धाय्गु शड्का व निराशां क्वत्यय्क बिइगु गुब्लें गुब्लें समाजसेवा यो जूयो (पश्चाताप) पश्त चायो चवनय मालिगु खःला दक मनय ग्याचिकु पहलं भुड हैगु ।

सुरेन्द्र कापी थःगु लाहातय काकां धाल - पुँजीवादी व्यवस्थाय् मनूत धेबाया लागिं, लबः या लागिं काय् म्हाय व मिसा तक हे मिइगु, त्यगु मत्यगु फुक्क कुकर्मत याइगु । धात्थें हे अब्बाता श्व समाज व्यवस्था पुँजीवाद खः । अलय थुगु समाजता समाजवादी विचलं शिक्षित व छप्पा छधि मजपूं मनूत धेबाया लागिं सीडः सीडः जुइगु खाँ मसिला जुई । मभिं, मचः व मज्यूगु खाँ क्यडः ल्हवनयगु मौका बियमः । इलय ब्यलय छलफल याडः मुडः मनया खिति चुइके मः । अथे याःसा जक संस्थात बांलाडः हज्याई । थुक्रिया खायँ छिकपुं हकनं छकः बिचः याडः दिसैं । छव लिपा हकनं भी नपा लाय् । सुरेन्द्रया खाँ न्यडः फुक्कसिया मनय हकनं छक तुइजला लुल । ज्यू छवःलिपा भी हकनं छक नपालाय धायो छम्हा छम्हा यायां फुक्क पिलिचां प्याहाँ वान । सुरेन्द्र शम्भू प्रसादया डायरी स्वथानयता क्वथा पाखय वान ।

सुशासनया लागिं चवय चवय्या पदाधिकारी पिनिगु सम्पति

छानबिन याय्मः

विवेक

ट्रान्सपरेन्सी इन्टरनेशनल नेपालता हलिमय अपलं भ्रष्टाचार जुइगु देया धलः खय तः तं वगु दः । सुननं धाला धय्वं उकिता खः हे दक धाय् मःगु यां मरु अथेनं देया फुक्क लागाय भ्रष्टाचारं त्वपुयो चवंगु धःसा धात्थेंगु खाँ खः । अन्तरराष्ट्रिय रूपं बेइजत जुयानं भीपुं शासक दलया नेतातय्के छु नं लाज शरम धाय्गु मरु । 'न्यागु यासां ज्यु' धाय्गु मानसिकतां भ्रष्टाचार छु मखु धाय्थें जुयो वांगु दः ।

शासन सत्ताय वापुं नेतातय्गु जीवनस्तरय छत्थं हे ह्युपा वगु, चप्पल न्याडः यें देशय द्रहं वपुं नेतात नेदा प्यदा मन्त्री व सांसद जुय धुंक यें देशय आलिसान महल, करोडौया बैंक व्यालेन्स, करोडौं वांगु गाडी न्याडः गयो जुइगु अलय अर्बपति व्यापारतय्तानपां माथ याय्गु याडः जीवन हाडः जुय फःगु भ्रष्टाचारया ग्यसुलागु दसु खः । व नेतातय् न तः तः हांगु उद्योगत हे दः अलय छु पेशा व्यवसाय हे दः । अथेनं गथे अरबौया सम्पतिया मालिक जुला ? थजगु विषय न्यनय कानय् याडः हिलमाल (छानबिन) याय् मःगु मखुला ?

राजतन्त्रय राजावादीपिसं थः यथें राज्यया ढुकुटी द्रहं वाडः हारालुट यागु, देया सम्पति राजपरिवारया थःगु सम्पति थें याडः खर्च याइगु अलय दरवारनपां स्वापु दःपिसं न्यागुयाः सां 'पञ्चखत माफ' याय्गु व्यवस्था दःगु जुल । जनतां उकिया विरोधय आन्दोलन याडः २०४६ सालय नेपालय बहुदलीय व्यवस्था निःस्वांगु खः । उगु आन्दोलनय न्ह्यलुवा जुयो चवंपुं मध्ये अः सरकारया न्ह्यलुवा जुयो चवंपुं नेतात नं दः ।

उगु इलय जुजुवादीपिसं याय् ज्युगु नं मज्युगु नं ज्यायाइगु खःसा अः एमाले, काङ्ग्रेस व माओवादी नेतातय्सं नं अथेहे याडः चवंगु दः । दलया नेतातय्सं प्रधानमन्त्री, मन्त्री, मुख्यमन्त्री थजगु चवय चवयया पदय् वानय्गु धाय्गु हे न्ह्यगु पुस्ताता गाकः सम्पति कमे याय्ता जक मति तयो वानिगु । व नेतातय्सं कानुन बमोजिम दाँय दँ सं सम्पति सार्वजनिकीकरण याय् मः धाय्गु नं मताय्कः । छुं नं औपचारिक निकायं मन्त्री जुय हाँ व मन्त्री जुय धुंकः या सम्पति छानबिन याय्गु खःसा छम्हा नेम्हा बाहेकं अपल मन्त्रीतय्गु सम्पति आकास जमिनति पागु खानय दै । मन्त्री, सांसद, मुख्यमन्त्री वा न्यागुनं चवयया पदय् चवडः चवंपुं निश्चित आयस्रोत दःपुं पदाधिकारीपिनिगु मनय् हे मरुको सम्पति कमेयाडः तःगु खानय् दयवं भ्रष्टाचार याडः कमेयागु जुयमः दक धाय् छिं ।

थुगुइलय माधव नेपालया विरुद्धय पतञ्जली योगपीठया जग्गा हिनामिना प्रकरणय भ्रष्टाचार मुद्दा दर्ता जगु दः । उगु मुद्दां नेपः या राजनीतिखय् वाज्या क्वाज्या सांक ब्यूगु दः । थव अजनं छुं दिन न्याडंतुं च्वनि तिनि । नेपालय थजगु खाँ ज्या चलय् जुइगुता अस्वाभाविक काथं काय मालि मखु छाय धःसा गृहमन्त्रीया राजिनामा फ्व फ्व संसद अवरुद्ध (चलय मयाकः) चवंगु दः । अः संसदय हकनं छगू न्हूगु बिषय द्रहं वै, व खः, पतञ्जली जग्गा प्रकरण ।

मन्त्रीपरिषदं क्वः छ्यूगु खाँयाता नीतिगत निर्णयया परिभाषा ब्यू ब्यू उकिता छानबिन व मुद्दा दर्ता याइ मखु धाय्गु खाँ

त तं वपिन्ता प्रधानमन्त्री, मन्त्रीतय्ता माधव नेपालता तःगु मुद्दा दर्ता न्ह्यो मवयंक ब्यूगु जुयमः । नेपःया संविधानं फुक्क नागरिक उथेंगं, कानुनस्वयो चवय सुनं जुय मफैगु खाँ स्वीकारय याडः चवंगु दः । अलय थवनं हाँ तक मन्त्रीपरिषदं न्याथिन्योगु देशघात व जनताता घात याइगु खाँ क्व छ्यूसां प्रधानमन्त्री व मन्त्रीत अख्तियारपाखं बचय जुयो वगु खः । दकलय न्हःपां पूर्वप्रधानमन्त्री विरुद्धय मुद्दा तयो देशता हे थुकीं बांलागु सन्देश ब्यूगु दः ।

माधव नेपालनपां छुं ई हाँ छम्हा पत्रकारं वयागु कोटेश्वरय चवंगु छै वाडः व्यापार व्यवसाय मयासिं करोडौया सम्पति गथे मुद्दा जक न्यंगु खः । उब्ले नेपालं लिसः बिला- “करोड धाय्गु गुलि तहांगु खाँ खः दकः ।’ उगु भिडियो प्याहाँ वगु नेला हे मफू बलय अः माधव नेपालया विरुद्धय भ्रष्टाचारया मुद्दा दर्ता जुगु खः ।

पतञ्जली जग्गा प्रकरणय पूर्वप्रधानमन्त्री नपां जुय धुंकम्हा नेपालता १८ करोड ५८ लाख व ड्युटतकाया बिगो व बिगो क्वतिया जरिवाना नपां हिदा निसें हिंयदातक झ्यालखानाय् कुनय्गु माग दाबी यागु खः । मुद्दाया अनुसन्धानया इवलय् अख्तियारं बयान काय्गु इवलय नेपालय हे मन्त्रीपरिषदया नीतिगत निर्णयखय् अख्तियारं छानबिन याय् मरुगु बयान ब्यूगु खः । खयां थवनं हाँ मन्त्रीपरिषदया निर्णय दुनयँ द्रहं वाडः छगू नं मुद्दाया छानबिन यागु मरुनि । उकिंयाड प्रधानमन्त्री व मन्त्रीतय्ता कानुनविपरित ज्या सानय्ता घ्वासा ब्यू ब्यू यंकगु खानय् दः ।

माधव नेपाल २०६६ जेठ ११ गते निसें २०६७ माघ २२ गते तक प्रधानमन्त्री जुगु

खः । वालुवाटारया जग्गा निजीयाडः मियगु ज्या नं उब्ले हे यागु खः । उगु काण्डय पूर्व प्रधानमन्त्रीत नेपाल व बाबुराम भट्टराईया तप्यंक दुतिंगु खानय दःसां नं अख्तियारं मुद्दा हे चलय मया । अदालतं उब्लेया भूमिसुधार मन्त्रीत डम्बर श्रेष्ठ व चन्दन देव जोशीया विरुद्ध मुद्दा चलये यासां छगू हे मन्त्री परिषदयागु निर्णयखय् अध्यक्षता यापुं प्रधानमन्त्रीत प्रतिवादी मजुङ्गु वहे निर्णयया लिधंसाय मन्त्रीपरिषदया दुजः पुं दोषी याय्गु ज्या न्यायोचित मजुङ्गु आशय नपां फैसला याडः जोशी व श्रेष्ठता सफाइ ब्यूगु खःसा उब्लेया भूमिसुधार मन्त्रीया सचिव, मेमेपुं कर्मचारीपुं व जग्गा न्यायमिययापुं अपलंसिता दोषी क्वः छिडः सजाय ब्यूगु खः । उगु काण्डया गुलि नं अभियुक्तपुं अः नं जेलय हे तिनी ।

भारतीय नागरिक रामदेव व बालकृष्ण आचार्य मुख्य पदाधिकारी जुयो च्वंगु पतञ्जली योगपीठता हृदबन्दी जग्गा छूटखय् जग्गा न्याकय् बिय्गु स्वीकृत ब्यूसेलिं नेला हे मफूबलय् वहे जग्गा मियता मन्त्रीपरिषदं निर्णय ब्यूगुलिं तप्यंक हे मिलय मजुगु खानय दः । ८१५ पी जग्गा हृदबन्दी छूटखय् जग्गा न्याय्गु छुट दःगु स्वीकृति दः सेलिं पतञ्जली ५९३ पी जग्गा न्यासेलिं राज्यता तःहांगु हानी नोक्सानी जुगु खः । उगु मुद्दाय सुसु दोषी खः व धःसा स्पष्ट याय् हे मः । निर्दोष फासय् मजुङ्गु याड छम्हा हे दोषीत छुट्य मजुय मःधाय्गु नेपः मि पिनि इच्छा खः ।

नीतिगत निर्णयया स्पष्ट परिभाषा दय्मःगु खाँ ता ई निसें मामां वगु खः । अख्तियारं नीतिगत निर्णय धाधां छानविन याय् मज्यूगु धायो कानूनी प्रावधानं फाइदा काकां थव नं हाँ या चेयर एयर काण्ड, लाउडा काण्ड, वाइडबडी काण्ड उब्लेया प्रधानमन्त्री व मन्त्रीत अःतक बचय जुजुं वयो च्वंगु दः ।

अः संसदया राज्यव्यवस्था समितिपाखय उपसमिति 'मन्त्रीपरिषदया निर्णयखय् नं कानूनी परीक्षण ज्यु फैः' व्यवस्था नपांया प्रतिवेदन समिति ब्यूगु खाँ प्याहाँ वगु दः । अथे नं प्रधानमन्त्री ओली व विपक्षी दलया नेता शेरबहादुर देउवा उगु प्रावधानता बांलागु मति मतःगुलिं प्रक्रिया हज्याय मफूगु सांसद पिनिगु धापु खः ।

२०४६ साललिपा प्रधानमन्त्री जूपुं मध्ये माधव नेपाल हे भ्रष्टाचारया मुद्दा कुब्युम्हा न्हपांम्हा प्रधानमन्त्री धःसा मखु । २०६१ सालय प्रतिगमनया इलय शेखहादुर देउवाता मेलम्ची खानेपानी योजनाय् भ्रष्टाचार याता धाय्गु द्वपंनय ज्वंगु अलय लिपा सर्वोच्च अदालतं मुद्दा खारेज यागुलि प्रक्रिया हज्याय मफूगु खः ।

अःएकीकृत समाजवादीं माधव नेपाल विरुद्ध मुद्दा चलय यागु याता राजनैतिक प्रतिशोध व षड्यन्त्र जक धायो च्वंगु दः । पार्टी नेतातय्सं राजनैतिक रुपं हे प्रतिवाद याय्गु धायो च्वंगु दः । पार्टीया न्वकु प्रकाश ज्वालां धायो च्वंगु दः - अध्यक्षता मुद्दा चलययागु राजनैतिक प्रतिशोध काकां षड्यन्त्रमूलक प्रहार यागु धाय्गु जिमिगु लिचवः खः । जिमिसं थुकिता राजनैतिक काथं हे प्रतिवाद याय । (कान्तिपुर) २३ जेठ)

सुयातां आरोप वियवं हे अपराधी काथं धाय् मज्यू । स्वय मज्यू । अदालतता स्वतंत्र, निष्पक्ष काथं छानविन याडः न्याय वियगु वातावरण दयकेगु अः सकलसिया कर्तव्य खः । अदालतं अन्तिम निर्णय मब्यूतलय सुयातां अपराधी धाय् मछिं ।

एकीकृत समाजवादीं प्रधानमन्त्री ओलीं हे 'प्रतिशोधया भावनां' याकगु द्वपं बियो च्वंगु दः । द्वपं न्हयागु हे व्यूसां अःप्रतिशोध मखुधाय्गु पुस्टि याय्गु जिम्मेवारी सरकार याय्गु खः । न्यायालयं स्वतन्त्र व निष्पक्ष न्याय बिइ धाय्गु सकलसिया आशा खः । सुं नं मन्

कानून स्वयोच्चय च्वनय मरु धाय्गु खाँ थुगु मुद्दां क्यडः च्वंगु दः । अः अपलं पूर्व प्रधान मन्त्री व मन्त्रीतय न्हयों मवयक च्वंगु दः । थुकीं संसदय विचाराधीन नीतिगत निर्णयसं उपसमितिं ब्यूगु प्रतिवेदनकाथं सांसद पिन्ता हज्यायता नं वः बिई । अः अख्तियारनपां संबैधानिक आयोगय पदाधिकारीत शासक दलपिनिगु भागबन्डाखय नियुक्ति याइगु चलन दः । थुकिता पानय् मफूतलय निष्पक्ष न्याययाई धाय्गु म्हागसय नं खानय् म्वँ । थः ता नियुक्ति ब्यूपुं नेतातयता गथे भ्रष्टाचारया मुद्दा चलय याय् फै दक ? गथे वाता बुकः न्यायाधिशं फैसला याय फै दक ? थव अथे हे धाय् फःगु खाँ खः ।

खः सुयातां प्रतिशोधं मुद्दा चलय याय्गु बांलागु खाँ मखु प्रशोधया भावनां दलया नेतातय्सं ज्या यात धःसा देशय अराजक स्थिति वयफ । छम्हासिं मेम्हासिता क्वथय्गु जक ज्या याडः जूसा नेपालं नं पाकिस्तान व बंगाला देशं थें ग्यापुगु स्थिति फयमालय फः । उकिं प्रतिशोध (महितां) मखु, सत्य तथ्य दसि प्रमाणया लिधांसाय स्वतन्त्र अलय निष्पक्ष न्यायया लागिं फुक्क छप्पा जुयो हज्याय मः ।

२०४६ साल निसें थौंतक शासन सत्ताय वापुं प्रधानमन्त्री, मन्त्रीत, आयल निगम, विद्युत प्राधिकरण, नेपाल बायुसेवा निगम थजगु मूमू पदय थयं पुं पदाधिकारीपिनिगु सम्पति छानविन याय्गु पाखय् सरकार हज्याय्मः थुकीं नेपालय जुइगु भ्रष्टाचारया हाँगः निसें सिईके फै ।

गिरी बन्धु टी स्टेट, ओम्नी काण्ड, माओवादी नक्कली लडाकु तय्गु धेबा कायो नःगु काण्ड थजगुलि सुसु दोषी धाय्गु सिय दै ? सुशासन नितिं अःयायपुं व न्हपा यायपुं उच्च ओहदा च्वडः ज्या सापुं पदाधिकारी तय्गु सम्पति छानविनता भ्रष्टाचार पानय्गु मू लिधंसा काथं काय् फैला कि !

सिन्हापता मयजु

छा देशय सिन्हापता मयजु धयाम्हा मिसा मचा छम्ह दु। वया मां मदु, बौ मदु: दाजु मदु, किजा मदु, तकेहें नं छम्हा हे मदु। वया च्वनेत छँ मदु, बनेत बँ मदु। अकि थथिति नाताकुता धयापि नं दुसां मदु हे धयाथे। सकसिनं वयात हेला याइगु, नागतुगु याइगु। हाना मदुम्हा मचा जुया वया जीवन हे उखे ला थुखे ला मदयाच्वन। कथहनं व ल्यासेचा जुयावल। मन्तेसं वयात ज्वेज्वेपिया स्वइगु वं खन। अले थके वगु ल्यासेसु वं वाचाल। तर, वं थत मन्त्या समाजय दुथ्याकेफुगु मखु। चीमिम्हा मन्, थ धयाम्हा सुं मरुम्हा मन् धका वयात सुनानं पत्या मया।

छन्हु सिन्हापता मयजु बांलाक सम्मा याना भ्रभ्र धायेक वसतं पुना पिहां वल। लँय वना च्वबले वं को छम्हा नापलात कोखं लँ पना वयाके न्यन - “सिन्हापता मयजु, सिन्हापता मयजु, छि गन भाये” धका न्यन। “कादसा पयनं वने, व्वं- दसा भयय वने” धका लिस बिल। कोखं वयात जिके वये- न्ह्याला धका न्यन। ‘छंगु नये पह हाले पह गथे?’ धका सिन्हापता मयजु न्यन को क्वाक्वा हाल। को हागु खना सिन्हापता मयजु ‘आखे जि छंके वये, क्वा जक क्वाना स्याइ’ धाल। उलि धायेव कोखं वयागु लँ तोताबिल।

कोखं लँ तोताबीव सिन्हापता मयजु थगु लँ लिना वन। वँ वँ वँ हानं वं वखु छम्हा धोदुत। बखुनं वयाके ‘सिन्हापता मयजु, सिन्हापता मयजु छि गन भाये’ धका न्यन। “कादसा पयनं वने, व्वंदसा भव्य वने” धका सिन्हापता मयजु लिस बिल। बखुनं ‘जिके वयेन्ह्याला?’ धाल। सिन्हापता मयजु छंगु ‘नये पह हाले पह गथे?’ धका वया के न्यन। बखुनं घू घू हालाक्यन। बखुं घू घू हागु खना सिन्हापता मयजु ‘माखे जि छंके वये घु जक घुया स्याइ’ धाल। अले बखुं भुरं व्वयावन।

सिन्हापता मयजु हानं न्ह्यज्यावन। आवं छम्हा चखुं नापलात सिन्हापता मयजु

स्वये हे भम्चार्थे च्वंक छयेपा वयाच्वंगु खना चखुनं वयाके न्यन - “सिन्हापता मयजु, सिन्हापता मयजु, छि गन भाये” धका न्यन। सिन्हापता मयजु को व बखुंयात धयाथे हे ‘कादसा पयनं वने, व्वंदसा भव्य वने’ धाल। चखुंयां नं विउदसा व्याहा याये धका जुयोच्वम्हा ख नि। सिन्हापता मयजु कादसा पयनं वने धागुलिं चखुंयां जिके वयेन्ह्याला धका न्यन। न्ह्याला न्ह्या, तर छं नये पह हाले पह गथे धका न्यन। चखुंया चिलिचिलि हाल सिन्हापता मयजुया मनं मखन। ‘अथे ला छ हालेगु?’ म्हाखे जि छंके वये, चिजक चिला स्याइ’ घयाधिया सरासर वन। चखुंया निरास जुया वन।

सिन्हापता मयजुयात सुनानं व्वंमदु। आ ल्यासे जुसेलिं सुनानं कादइला धका च्वन। कावमदुगु मखु, दु। को वल, बखुं वल, चखुं वल। तर, वया मनं तुनाथे च्वम्हा वयात बांलाक नके त्वंके याना लहिनातइछम्हा छम्हा हे चूलागु मखुनि। अकिं व थगु लँ लिना न्ह्यायां हे वनाच्वन। व वयाच्वंगु छम्हा छुं खन। छुं वया न्ह्योने वया धाल - “सिन्हापता मयजु, सिन्हापता मयजु, छिगन भाये?” धाल। सिन्हापता मयजु धाल “कादसा पयनं वने, व्वंदसा भव्य वने” धाल। छुं जिके वये- न्ह्याला धाल। सिन्हापता मयजु छंगु नये पह हाले पह गथे धका न्यन। छुं च्वीं च्वीं हाल। छुं हागु सिन्हापता मयजुया चित्तय लोथे च्वन वं धाल - “हालेगु पह ला आसथे जुल का। नयेगु पह गथे ले?” सिन्हापता मयजु थत ययेकूथे च्वना छुंया लयताया थागा हे मंत। वं धाल - “जुजुया धुकू ला जिगु छँ। छु जक नये! घ्य,दुर्, ला, खँ, न्या, महिचहि धागु धाक्को यगु यक्को नयेगु दु।” छुं या खँ न्यना सिन्हापता मयजुया मन स्वकु थहां वल। वं मालाच्वंगु थज्याम्हा हे मिजं। छुं नाप योत्यो जुल। अय्सा छंके हे वयेगु जुल धया सिन्हापता मयजु छुं याके पयनं वन।

मुंम्हा प्रेम बहादुर कसा

छुं सिन्हापता मयजुयात जुजुया धुकुलिइ व्वनायंकल। हाना मदयेका लतंफतं जुयाच्वम्हा सिन्हापता मयजुया थः धयाम्हा, थत धाइम्हा बल दत। सासा भिंभिं नया सुखं जीवन हनेदत। अकिं व साप लय्ता। छुं याके वना गुलिचां मदुवं सिन्हापता मयजुया प्वाथय नं दत। हाहान्यान्यां लां दन। मचा बल। मचायात व मचाबूम्हेसित बुकेंत चिकं माल। सिन्हापता मयजु छुंया गपतय भौंचा छग घाकाबिल। छुं चिकं कयाहये धका वन। चिकं तुइ धका घलय भौंचाक्ववछम्हेया थ हे चिकं घलय कुतुवन। थहाँ वये मफया छुं अन हे सित।

चिकं कावम्हा छुं गवेतनं मव। वइथे वइथे जक च्वना वगु हे मखु सिन्हापता मयजुया नुग खुलुखुलु मिन। गबेत जायेका नं मबसेलि थ हे बना स्ववंबले छुं चिकंघलय कुतुवना सिनाच्वंगु खन। सिन्हा पता मयजुयात पर्वतं क्वच्यवथे च्वन। त्वलहँ स्वया वाताहां च्ववंच्वन। ‘कोयाके मवना, बखुयाके मवना, चखुं के मबनाह सुयाके मक्से छंके वया, छं छु याना प्राण’ धका चिल्लाय दना छक हाल, अले वाकु व्यना बनावन। लिपा होसय वयेव थथे धया विलाप यानाच्वन :-

‘मन नका मत्यू तीका तम्हा

छुं ज पुसामि हाइ हाइ !

सिन्हापता मयजु विलाप यायां ख्वयाच्वन। धुकुति छुं म्वोक मिसाया ख्वस वगुलिं जुजु अदभुत चाल। ता खना स्वबले मचा बूम्हा ल्यासेम्हा मिसा छम्हं। जुजुं वयाके छ गथे याना धुकुतिइ वया छाया ख्वया धका न्यन। सिन्हापता मयजु छगू छगू दतले फुक्क खँ कन। वयागु खँ न्यनेधुंका जुजुया व खना कना वन। स्वोल गनं वनेमते थन हे दरबारय च्वं धया सिन्हापता मयजुयात दरवारय तया लहिनातल।

थःगु रूप मामां... अरूप जि

पुर्ण वैद्य

गुलिं ज्ञान

व्यवहार्य हिले मफया

थौया बजारं

जिन्दगी - जि

तः कः ख्वं जुयाः

लिहां वयागु दु ।

थःगु हे भाः तंगु

श्व शहर दुने

चा ह्युह्यं

रंगीचंगी ताहाः थें बाः वयाचवंगु

सभ्यताया म्ह्य चुलुयाः

तःकः जिं थःत हे त्वः फिया

वयागु दु-

थम्हं हे थःगु हुलिया

ब्यूवइगु दु ।

प्रचलित मूया

शख्त अःखः जि

न्हिथं अवमूल्यन

अवमूल्यनया

त्वाथलं कुतुं वयाः

वैस प्वचिना हयागु

दक्कं रुप थःगु

सच्छि थाय् चिच्चा दनाः वाःगु दु

गुलिं मनूतय्गु क्रुर अहम्य हानाः नं

रूप जिगु चंदंगु दु-

गाः ध्याचः या श्व लँ दुवातय्

म्वयेहे मलाकं

वं श्वं मदयेक लाःथाय्

न्हुयावगु दु ।

थथे जि थौ

थम्हं हे ग्वयागु आकृतिं

थः भिरिकुति जुइक गुनागु दु

थःगु हे रूप, थः हे विखण्डित - जि

कुचा कुचा जिन्दगीइ

बेरूप म्वानागु दु रुप मामां

सीमितता व अनिश्चिततां

थः त ल्हयया ल्हयया- भौचां स्वथें

जिं थःगु आकाश माः वया -

ईया जति प्युप्युं

ईया खिउँल खतं नःगु दु गुलिं

किलं नःगु पुसा थें

सान्त्वनां जक पर्का तःगु - जिन्दगी श्व

न्हयाथाय् नं प्यनातःगु

कँकँ तारया बारय् जक तक्यनाः

जिन्दगी जिगु-

तःथाय् गुगु दु ।

छं स्यू ... ?

जिन्दगी - जि

गूगु थाय् पतिकं

जिगु ई - नांगां खने दुगु दु

घालं ति स्वःस्वः वः थें

अन, जिगु सत्यया- विभत्स / विसंगति ज्वयावःगु दु

कित्यां कित्यां जक

कतः या भाग्यया हे

बनेज्या याइगु (बेच बिखन याइगु)

श्व शहर - बजारय्, वाःथाय् पतिकं जिं हानं

थः त म्वः वया

चुं दंगु थःगु रूपया चुंचां

सिनाः काः वया

स्वाना : चकंकेत सखे

जिं हानं थःगु बै माः वया

श्व मोल तोलया जक दुवातय्

हानं जिं -

थःगु मू न्यंवया

थःगु बिचाः ग्यः वया (ह्यू वया)

श्व शहर-बजारया व्यवहारय् ।

ने.सं. १९९३ बछला

असार नपां ताडः वांगु थी थी वस्तुत

आशा कुमार चिकंबजार



असारया सिन्हाज्या, भुलुभुलु साँसि व
सिरिसिरी फसं दायो मन चङ्गा
ज्यापुया काय मचा, न्हिया न्हिथं बुँया ज्या
पासा वया इज्री व मगः चा ॥

असार वलकिं मनय् छगू काथंया
लसतां जाई । थुगु वर्षया नसा ज्वलं
सय्केता फयां फक्व हिचः ति हाय्कः,
थाकु अःपु मधःसैं सिन्हाज्या याडः मनय्
कन्हेया म्हागस म्हाकी । म्हेग, तः नुया
च्यूता मतः सैं छ्वपु छ्याडः बुँपाज्या याडः
पालः तःगु चा, वहे ताल्लाया छगु लिभलं
गांगु चाखय् सुपायें तज्याडः गांगु वालं
न्यायकः जक मखु फुचाय्क भेटेथें याडः
हकनं छकः प्रकृतिया धर्ती माथां वांकी ।
बुई नाखं जालकीं चं चं धःगु मनय्
सिन्हाज्याया म्यें श्वई । प्वाचा पुइम्हा
थाकालीया मनय वाय्की । गनां प्वाचा
पुयबलय् मखांकः मचाय्क घायें नं वानिला?

अज दाहाँचा स्वताडः वानिला धाय्गु गया
ग्यां मिखा त्यल्लाक प्वाचा पुयो च्वनि ।
प्वाचा पूम्हा न्हयलं ब्वाई धायो इलय् ब्यलय्
न्वापु श्वकी । बुँ पालिम्हा ज्यामिं चापायें
पुइक घायें ल्हाकः नाः या सः वयक
संगीतया भंकार श्वयकी । अलय् कुज्या
याम्हा ज्यामि दाजुं गः टूँ माथांक तःक्वगु
चा तछ्याडः वापियता थाय् दयकः है ,
वापिइपुं ज्यापुनि मिसामस्तय्सं वापिडः है ।
अलय् बुहीम्हा अजिं सिन्हाज्याया म्यें छुड
है ।

सिन्हाज्या वानय त्यलला ल्यासे तता
जिता नं ब्वडः यनिला
वापिय मन्याडा, ज्यामि जुय मन्याडा
बजिजक हेय्क नय्ता वला धाइला ?

वापिज्याया बजि धाय् भवयं नय्थें
हे तः ता घासा तयो नकिगुलि थुब्लेया
बजियाता च्वछायो म्येखय नं न्हिथाडः तःगु

खः । न्हा न्हा भ्योतय् तयो बुव, घासा,
वाउँचा नपां मल्ता घासा नं तयो हैगु,
वापिज्या बजी नाइसे च्वंसां अज भाति
बास वसां साकः नैगु यां जुल । अलय
माघ बलय हे श्वें थुयोतःगु श्वें इलय-
ब्यलय भ-दिडः स्यं स्यं धाय्क थाकु
मचाय्कः ज्या सानिगु सिन्हाज्या म्वाम्हा
स्याडः सीम्हा म्वाकय्गु' काथं धायो वगु
दः । प्वाथलय् च्वंगु म्वागु प्वाचा पुयो
स्याडः सीम्हा वहे प्वाचा वापिडः म्वाकः
छमनाया पिडः छमुरी सय्क संसारता
प्वाथांकः पित्या तांकयगु ज्या याइगु छगू
तस्कं महत्वं जःगु जीवनोपयोगी सिन्हाज्या
काथं हाडः वयो च्वंगु खः ।

सिन्हाज्या दुस्वः वैन धायो हवय
धुंगु यलामुखु स्वः इवः जुय हाँ सिमाय्
सिन्हाज्या स्वं हवै । श्वहे इलय जक हवैगु
जुगुलिं थुकिता सिन्हाज्या स्वं धःगु जुयमः ।



श्व सिमाय हवैगु जुगुलि द्योकय् उलि छाड्गु
माखाडा । सायद श्वय मफयो जुयमः ।
अथे हे थुगु इलय हवड्गु मेगु स्वं खः चम्पा
स्वं । तुड्कः ख्यडः हवड्गु चम्पास्वं छुयो
वम्हा छम्हा ल्यासेया समायाता च्वछःसे
म्ये खं वर्णन याई -
गा च्वतं ग्वाली पु
पतासिनं पालि पु
छुया वल चम्पा स्वान
छ्यालय भ्व भ्व पु ॥ सिन्हाज्या ॥

असारं श्वकिपू कमिचा,
पाँकमिचा, बोहत्यापाया मचा तय्ता की
लाड नयगु स्यनय हैगुलिं थुगुइलय मन्या
जक फुक्क धाय्थे मानवस्रोत छ्यलिथे थुले
पशु (वासोँ/गोरु) न्हूँपु छ्यलिगु नपां पशु-
पन्थी व मन्या न्हूँ पिदानिगु छगू काथ्या
दबु खः असार धःसां पाइमखुला ? थुगु
इलय छ्यलिगु थी थी वस्तुत अः न्हूँ वस्तुं
कायो यंकः सेलिं पुलांगु वस्तुत नपां नेवः
खाँगव नं ताडः वांगु थें जुल । थुकि दुनय
नं छपुलु वालय् दःसा न्हूँगु पुस्ताता नं

खाँगवः ल्यडः च्वनिला धाय्गु आशा व
विश्वास खः ।

पहिकुसा/ वापिज्या कुसा - श्व
नेपःया थःगु मौलिक उत्पादन खः ।
पँबालाचां नेबा थाड, उकि दुनय छताजिया
लप्ते तयो दयकिगु थुगु कुसा अः मदयो हे
वान धसां ज्यू । न्हपा न्हपा भी पुर्खाया
तापाक्क देकय्वानिबलय् ज्वडः वानिगु थुगु
कुसाया न्हःपां लप्तेताडः उकिया पलेसा
प्लाष्टिक (स्याबलट) तयो दयकसां अः
वर्षादी वयानं श्व ताडः वान । उकि दुनय
ककुतय् क्यंकय्ता गःकि खिप नं तयो हःगु
दै । थुगु कुसा वालं मदाइगु जक मखुसें
लुमुइगु नं जुगुलिं वर्षादी नपां स्लिपिड
बाय्ग काथं बुई नाः छु वानिबलय् बायें सं
देनय्ता बापा लायो बापा फायो देनय्
काथंछिंक नेपः या भौगोलिक वनावट व
वातावरणता स्वयो भी पुर्खापिसं दयकगु
खानय् दः । अः थुगु कुसा ताडः वांसेलिं
भीगु उत्पादन व उद्योग ताडः लजगा नं
ताडः वांगु जुल । थुकिता न्हूँ काथं छ्यलः

हय फःगु जूसा भीगु मौलिक पहः ल्यडः
च्वनिगु खः ला? बिचः याय् बहजु । उब्ले
बाज्यापिसं दयक तकगु उखानता लुमांकः
स्वयगु खःसा 'सिलुइ थ्यंगु कुसा व द्रलखाय्
थ्यंम्हा मिसा बचय जुय थाकु' जक धायो
तक काथं खाँया इतिहास प्वलः स्वय मः
थें च्वं ।

क्वल्हें (खमु)ः क्वल्हें स्वनिगःया
ज्यापु ज्यामिया छगू मौलिक वस्तु धाय्मः ।
भीगु थासय् हे दैगु पँ बालाचा थाडः
क्वल्हेंपता तयो थाइगु क्वल्हें अः उलि छ्यःगु
मतः हे धःसां ज्यू । चक्वल्हें केतुकी फिडः
नालु दयकः थाइगु नं अः छ्यल च्वंगु
मरु । न्या क्वल्हें वसेलिं ताडः वांगु उगु
परम्परागत क्वल्हें छ्यसेलिं उगु ज्या याइपुं
नं विस्थापित जुल । गः क्वल्हें, बाचाक्वल्हें,
क्वल्हें, चकोल्हें अः बुलुहुँ ताडः वांसेलिं
असार बलय् क्वल्हेंखय् बजीतयो पहिकुसां
तपुयो तयगु चलन ताडः हे वान धःसां
ज्यू । अलय् मध्यपुरय् तरकारी कुबियता
धःसा गनां गनां छ्यलः च्वंगु खाडा ।

सोमा बुई भः दिकय्ता सोमाचा
हाइगु लिसें ख्वलाय् तयो श्वें त्वकिगु चलन
अः प्लाष्टिकया सोमा बोटल व गिलासं
थाय् काल । अलय् असारया श्वें बुलुहुँ
कोल्ड हिड्क्सं कायो हल ।

कूया पलिसा कुज्या याय्ता
क्वाक्वाचां (कृषि भाषं, हो) थाय् काल ।
अः मिजंत स्वयो बुँज्यामि अपः मिसात हे
जुयो वल । बुलुहुँ आधुनिकताया ध्वलं थियो
हःसेलिं अःमिसिं वापिड्गु नं खानय् दयो
वल । थजगु इलय गमलाय् वापिड,
सिन्हाज्या याय् मालिगु नं दिन वयफः ।

असार बायें अथेधाय् असार १५
गते धौबजी नयगु चलन धःसा नेवः समाजय
न्हूँ दुस्व वगु हे धाय्मः । न्हपा न्हपा थुगु
चलन कः धाडः तःगु धःसा खानय् मरु ।
अशिललताया नामय भौ काय्गु चलन ताडः-
वांथे द्रः (द्यो) स्वानिबलय रसरंग काथं
भेटे, चां कय्किगु चलनता अः नाखय हे

सच्छि व खुड्छगूगु स्वप पौ. बःछि पौ(पाक्षिक)

रवः तुक, बुतु बुल सानिगु चलन नं घ्वातुघ्वाड, दुस्वय तांगुता इलय हे पानय मः थें ताय्का ।

सिन्हाज्या गाठामगः चहे हाँ सिधय्कः गाठामगः चहे बलय सिन्हाज्या व्यंकय्गु चलन याडः तःगु खानय् दः । थुगु इलय छँ सुचुकुचु याडः असारमा खिति चुइकेगु धायो म्वः ल्हूयो, गाठा मगः ता मचातय्सं काप क्वचा मुडः द्यकः तःगु कतामारी क्वखाय्क थःथःगु लागाय् उय् यंकिगु चलन याडः तःगु खः । भलभल अष्टमी (भगस्टी) खुनुं निसें नवदुर्गा द्यो जलसं बिज्याइगु धायो थुल्लें नाखं वइगु ल्वय पानय्ता द्यो दःगु नाखय् फोहर याय मज्यगु खाँ पूखां बिचः याडः हे धायो तकगु खानय् दः । थुगु इलय अपलं वः फय, चा, लिभः, नाः नपां ल्वाय् मालिगुलिं सुयातां भाडाबान्ता, हैजा जूसा नाखय् दिशा यातः धःसा व बः वाड, यक्व थासय माहामारी काथं डाडः पुनय फःगुलिं उकिता बिचः याडः हे थुगु इलय नाः फोहर याय मज्य धायो तःगु वैज्ञानिक तथ्य तस्कं बांला । न्ह्याडः च्वंगु गंगा शुद्ध धायो वहे वाबुँया नाः खं तुं ख्वला, भू चुल उकि हे नसा त्वँसा तयो नैगुलिं थुखय पाखय् सतर्क याडः हे थुगु खाँ हज्याक तःगु तस्कं बुद्धिमानी धाय् ल्वः ।

वातावरण उगु इलय वाचा जुडः वसेलिं वाउँसे च्वडः बांलाडः वइगुया जुहे जुल । अलय व वैबलय बः लाय्म' धाय्गु खाँ खं इलय हे फुक्क ज्या क्वचाय्के मः धाय्गु सन्देश नं ब्यू । चान्हय वगु व या बः लाय मफै बलय प्रकृतिता न्वा न्वां 'व वलां छुयाय् ब याता तुं जुलक' दक लाय मफूगु बःया व्यर्थता नं क्यडः च्वंगु दः । 'सिन्हाज्या याःसा सामाज्या दुकाय दैगु' सत्यगु खाँ नं काडः कर्म याय् मः धायो श्रमता माया याकिगु सिन्हाज्या थःगु तुतिखय् दानय्मःगु या पलिसा नं खः ।

असार बलय हरिशयनी एकादशी

नं लाइगुलिं थुगु इलय तुलसी नं पियमःगु अजा-अजिपिसं धायो तकगु दः । सुथाय त्यलं दाडः तुलसीमा पुजा याः सा पूण्य लाइगु धायो छँ अपलं अक्सिजन हवलिम्हा तुलसीमा पिडः स्वस्थ याय्ता क्यडःतकगु लाँपु धार्मिक स्वयो अपः वैज्ञानिक हे खानय दः । भगवान विष्णुता इवःपः जुयमः दक बिन्द्रां व्यगु श्राप काथं नारांघ्यो तुलसी जुगु पौराणिक बाखं कःघाक तुलसिया पुजा व उकिता ल्यंकः म्वाकः तय्ता यागु कुतः नं तस्कं वैज्ञानिक हे खः । तःता वासया शक्ति दःगु आयुर्वेदिक तुलसीमा ल्यंकः म्वाकः तय्गु श्व छगू अभियान काथं काय मः । तस्कं श्रद्धायाडः, म्वाक्य हे मःगु काथं बिचः याकः पिइगु तुलसीमाखय् न्हिया न्हिथं पुजायाडः, निनाः ताड, याइगु बिचलं थुगु तुलसी म्हवचागु वस्तु मखु धाय्गु सियदः ।

असारबलय बाजा थाय्मज्य धायो थुगु इलय बाजं त फुक्क अखालय् स्वथानय् यंकी । अलय गाठामगः चहेनिसें खु मरुगु बाजा थाय् ज्यगु खा धायो तकगु दः । थुगु इलय महाद्यो छम्हा उत्पति जुइगु दक नं धायो तकगु दः । महाद्योया रुप नित्य नाथ नासः द्यो दक नं धायो च्वंगु दः । वहे नित्य नाथ थुगु पृथ्वी बाजा प्याखं व म्यें स्यंगु धायो अः तक नं नासः द्यो हनय् तयो म्यें बाजा वा प्याखं स्यनय्गु याडः वगु खः । अः वयो बलुहुँ विदेशी बाजा त देशय् द्रहँ वसेलिं नासः द्योया नियमता नं भ्या भाति हाकुं चाय्गु याडः हःगु खानय् दः ।

अपलं गुरु पुर्णिमा नं असारया लिपा लिपाया वालय हे लः वै । बेद ब्यासया बुदिजक मखु थःता अक्षरारम्भ याडः ज्ञानया मिखा कांकः ब्यूम्हा गुर्याता 'आचार्य देवः भवः' धाधां गुर्याता पूजा याइगु चलन नं थुगु गुरु पूर्णिमा (गुरुपुन्ही) खुनुं याडः वगु दः ।

पिब्वयो, चाकलीं चञ्चलतां जाय्कः न्हिलासु पिब्वयो च्वंगु लकस दुनय

मनूया जीवनहे जीवन धायो काथं सन्देश पिब्वयो च्वनी । वा बुँई दें बल्लाक तय फःसा नाः मुडः च्वनिगु गुकिं वामा बांलाइगु काथं आर्थिक ज्ञान व भौगोलिक ज्ञान बियो च्वंगु दः । उकिं दें त्वः धुलला धायो आर्थिक सड्कटया बिम्ब कयं कयं मेगु विकल्पया वाक्व दें तयमःगु खाँ नं पुखां काडः तकगु दः । मभिम्हा जलाखाला लाःसा थःगु दें छाडः काय् योगुलिं पः तिला तय्गु बुद्धि नं पूखां बियो तकगु दः । देंमय वा पियगु, मुस्यामा पियगु, व मायें तय्गु गुकिं दें जक बल्लाइगु मखु मुस्यामा हाँगलं बिइगु नाइट्रोजक अलय छगू बाली दुनयें मेगु तः ता बाली नं काय छिगु बुद्धि नं पुखां बियगु त्वः फिइकगु मरु । अलय नाः अपलं देजायो दें त्वः थुलय् फःगुलिं बय् तयो उथिं ग्यंकः वायलेन्स याय्गु गणितीय ज्ञान नं काडः तकगु दः । नपां प्वारय् आड्सा ल्यंकः तय मःगु गनां दें त्वधुल वाचा ल्हासा हाँ छेंगः थांसा पुयो पियता वा गनां वाचा तानय् मःसा मेपिन्के काय म्वायकः वाचा गना कः वानय् धाय् म्वाय्क बचतया ज्या नं पुखां धायो तकगु दः । उकिं लाहातय् कुचु मनिं, बोहलय नोचा मनिं म्हा मनु लतफंग (कतया भरय च्वनिम्हा) जुई धायो श्रमता माया याय् मःगु आत्मनिर्भरया खाँ नं स्यडः तकगु दः पुखां । अलय बुँ बाँभ तय मज्य बाँभतलकीं सर्प, नागं बाय काययो धाय्गु ख्याच्च दुनय् अन्न उत्पादनता हृदाय तयो ज्या सानय्मः धाय्गु अर्ती नं तस्कं डालकाय् बहज् । मखुसा कतकय् लाहा फयो नैम्हा 'तलय फवंगी' जुइ धायो तकगु खाँ थुइके मफयो थौं देया हबिगत कत देशया भरय च्वनय् मःगु खः धाधां व मवसा बासी पुजायाय्गु चलन व ब्यां चाय्गु ब्योह याडः बियगु चलन दुनयया सत्यता नं हिल माल स्वय मालिला ? धन्य खः असार व असारया महिमा ।

क्लारा जेटकिन



क्लारा जेटकिन (clarazetkin) जर्मनी देया छम्हा कम्युनिस्ट राजनीतिज्ञ, तस्कं नां जःम्हा मजदुर महिला अधिकारवादी नपां अन्तरराष्ट्रिय मजदुर आन्दोलनया छम्हा लोकं हवाम्हा मिसा न्ह्यलुवा खः ।

क्लारा ५ जुलाई १८५७ सं साक्सेन (Sachsen) या बिडेराउ (Wiederau) धाय्गु थासय बुम्हा खः । वया ब्वा गोट फ्रीड इस्नेरे (Gottfried Exsner) छगू गामय छम्हा मास्टर व मां जोसेफिन (Josephine) एर्जगेफिर्गे (Erzgefirge) या छगू गामय ब्वलाम्हा खः ।

सन १९७४ सं हिंन्हयदाया बैसनिसें हे क्लारा जेटकिन महिला अधिकारवादी न्ह्यलुवा अगस्ती स्मिदि (Auguste Schmidit) नपां नपां लीपजिग (Lipzig) य् शिक्षिकापिनिगु गोष्ठी (मुंज्या)

सं ब्वति काला । सन १८७४ निसें १८७८ या दश्वी अथेधाय्गु हिंडादा निसें नीछदाया बैस दुनय जर्मनीया महिला संघया छलफल, अन्तरक्रिया व मे मेगु इवल्य् ब्वति कायोदिला अलय दकलय न्हः पां वयकः सामाजिक प्रजातन्त्रवादीपुं (social Democrats) नपां स्वापु तयो दिल । उगुइलय वयकलं रूसी क्रान्तिकारी ओसिप जेटकिन (Oscip Zetkin) नपां लाडः स्वापु तयो दिल ।

सन १८७८ य् हे सामाजिक मजदुर पार्टी (SAP) नपां स्वापु तःगुलिं परिवारनपां वयक ब्रुच (Bruch)य् च्वं वानय माला ।

सन १८७८ निसें १८८२ तक वयकलं प्यदा अथय धाय्गु नीछदा निसें नीडादा या बैसय तक साचसेन (Sachsen) व अष्ट्रिया (Austria) याय् शिक्षिका (Zourness) जुयो ज्या साडः दिला ।

सन १८८२ खय् हे क्लारां स्वीट्जरल्याण्डया जुरिच (Zurich) य् सामाजिक प्रजातान्त्रिक (Social Democrat) पार्टीसं दुतिडः ज्या साडः दिला । व हे दाँया नोभेम्बरय् फ्रान्सया राजधानी पेरिसय् ओसेप जेटकिन नपां च्वडः दिला । औपचारिक रूपं इहिपाया लागिं मःमःगु भ्वँत मरुगुलिं थःगु नां या लिनयें ओसिप जेटकिन (Oscip Zetkin) या पारिवारिक नां व बिनां (थर) जेटकिन तय्गु याता । जेटकिन परिवारय् नेम्हा

काय नं दत ।

सन १८८९ सं म्हाय् सुख मरुसेलिं ओसिन जेटकिन संसार त्वतल । पेरिसय हे क्लारा थमं नेकगु अन्तरराष्ट्रिय बैठक सःताला । उगु बैठकय् वयकलं महिला मजदुर आन्दोलनया छगू प्रवचन बिया दिल ।

वनलिं वयकः पेसागत व सामाजिक लागाया मिसामस्तय्गु उथिग्यंकः दयमःगु हकया माग त तयो वर्ग संघर्ष सम्बन्धी थीथी ज्या इवल्य् ब्वति कायो दिला । उगु इलय वयक स्वीनेदाया बैसया जक खः ।

सन १८९१ सं जमनीसं समाजवादी कानून दयकल । क्लारा जर्मनी फर्मेर स्टूट गार्ट (Stuttgart) य् बाय ल्ह्ययो च्वँ वल । दाच्छिलिपा अथेधाय्गु सन् १८९२ खय् सामाजिक प्रजातान्त्रिक (social Democratic) पार्टी पाखं समानता (Dil Gleichheit) धाय्गु छगू पौ पिथाडः दिल । सन् १८९५ खय् वयक जर्मनी सामाजिक प्रजातान्त्रिक पार्टी (SPD) या वामपन्थी पक्षया केन्द्रीय समितिया दुजः जुयो दिला । अलय स्टूटगार्टया साफू सुइपिनिगु संघया दुजः जुइके मबिइगु खः । अथेनं सन १८९७ सं वयकलं मोलर जोर्ज फ्रेडरिच जुन्डु (Moler Zeorg Frildrich zundd) नपां नेकगु इहिपा याडः दिल ।

सन १९०७ सं स्टूटगार्टसं समाजवादी मिसामस्तय्गु न्हपांगु अन्तरराष्ट्रिय सम्मेलन जुल । उगु सम्मेलनं क्लारा जेटकिनता महिला सचिवालय वा हेडक्वाटरया नकीं ल्यल । उगु इलय वयक डुन्यदाया बैसय थ्यनय धुंकल ।

सच्छि व खुड्डगूगु स्वप पौ. बःछि पौ(पाक्षिक)

सन १९१० य् डेनमार्कया कोपन हेगन (copenhagen Denmark) य् नेकगु अन्तरराष्ट्रिय महिला सम्मेलन जुल । आना हे क्लारां अन्तर राष्ट्रिय समाजवादी महिला दिवस डाय्केगु प्रस्ताव तल ।

सन् १९१४ निसें १५ या दुनयें न्हांगु विश्व युद्ध सुरु जुल । सामाजिक प्रजातान्त्रिक पार्टी (SPD) बुलुहुं सामाजिक अन्धराष्ट्रवादय तः क्यँ क्यँ वान । उकिं क्लारा जेट्किन पार्टीया वामपन्थी धारया न्ह्यलुवा जुय मखु दक धाल । अन्तरराष्ट्रिय समाजवादी महिला संघया छ्याञ्जेया हैसियत वयकलं सन १९१५ या मार्च महिनाय समाजवादी महिला सम्मेलन (socialist woman conference) या ग्वसः ग्वत । गुकीं याडः क्लारां प्यलातक इयालखानाय कुंकः चवनय् माल ।

अलेक्जेन्डर कोलोन्ताइ (Alexandre Kottontai) नपां मिलय जुयो क्लारां मता बिय मैदैगु जुल । निश्चित सम्पति व आम्दानी दः पिसं जक मतदानय ब्वतिकाय् दैगु जुल । वयक अजगु पक्षपाती मताधिकारया विरोधय धिसिलाक वयक अजगु पक्षपाती मताधिकारया विरोधय दाडः 'पूँजीवादी महिलावादी हकया विरोधय दाडः दिला ।

सन १९१६ पाखय कार्ल काउत्स्की (Kautsky) जु अन्धराष्ट्रवाद व संशोधनवादया लाँपु ज्वंगुलिं क्लारा, जेट्किन, रोजा लक्जेम्बर (Roza Luxemburg) नपां मिलय जुयो वामपन्थी लापु ज्वडः संशोधनवादया विरोधय स्यल्लाक संघर्ष याता । लेनिन- 'गद्दार काउत्स्की' धाय्गु छुपु चवसु पाखं वयागु पापु प्वलः क्यंगु खः ।

संशोधनवादीत नपां ल्वायता सन १९१६ पाखय लक्जेम्बर लिब्खनेत (Liebknecht) जुं स्पार्टाकसवादी (spartacistx) धाय्गु रोमया छगू दास विद्रोहया नेताया नामय वामपन्थी संगठन निस्वाना । क्लारा नं वहे संगठनय् चवडः ज्या साना ।

न्हपा क्लारा स्वतन्त्र सामाजिक प्रजातान्त्रिक पार्टी जर्मनी (Independent Social Democratic party Germany) या सह संस्थापिका (पलिस्थामि) खः अलय वयकलं 'समानता (Dil Gleichneit) छगु पौ पिथान, राजनैतिक व सैद्धान्तिक बिचः मिलय मजूसेलिं वयकलं समानता पौ त्वः तः दिल ।

सन १९१८ सं कार्ल लिब्खनेत व रोजा लक्जेम्बरनपां मिलय जुयो क्लारा जेट्किन जर्मनीया कम्युनिष्ट पार्टी (Kommunist Paric Daeutschlande – KPD) या पलिस्थामि जुयो दिल ।

सन १९२० य् वयक जर्मनी कम्युनिष्ट पार्टी पाखं माथिल्लो सदन राइखस्टाग (Reichetag) या दुज जुयो दिल । २ जुलाई १९२० य् जर्मनी कम्युनिष्ट पार्टीया न्हांगु सांसदया नातां वयकलं सोभियत संघनपां ऐकवद्धताया माग याडः न्वचु बिला । वहे इलय वयकलं सोभियत संघया न्हांगु यात्रा याडः दिल । सोभियत संघय वयकलं रूसी जनताया महान नेता लेनिन नपां पासा याडः दिल ।

वयक थी थी ल्वचं क्यंकः च्वम्हा गुलिं उपचारया नितिं गुब्लें सोभियत संघ व गुब्लें जर्मनय् वाडः चवन ।

सन १९२१ निसें वयक अन्तरराष्ट्रिय महिला कम्युनिष्ट (Die kommunistis che Frauen International) धाय्गु पौ,या न्ह्याकामि व

अन्तरराष्ट्रिय महिला छ्याञ्जे जुयो ज्या साडः दिल । वयक सन १९२१ निसें कम्युनिस्ट अन्तरराष्ट्रियया कार्यकारिणी समितिया दुजः (member of the Executive Committee of the communist Internationeel) खः । अथेनं सन १९२४ निसें हे वयक सोभियत संघय सं चवडः दिल । सन १९२५ य् वयकलं अन्तरराष्ट्रिय लाल सहयोग (Internationalen Rotein Hilfe) संस्था निःस्वाडः दिल । वयक उकिया नकीं जुयो दिल । सन् १९२७ य् वयक ७० दा खय थ्यन । वयकलं न्हयः दाया बुदिंया लसताय वयकता थी थी साहित्यिक व अन्तरराष्ट्रिय सम्मान फयो दिल ।

३० अगष्ट सन १९३२ या दिनसं न्हा याय्म्हा नकींया नातां न्हापुं निर्वाचित माथिल्लो सदन (Reichetage) या उलेज्या न्वचुसं क्लारा जेट्किन पूँजीवादी समाज व्यवस्थाया सामुहिक प्रतिकारया लागिं इनाप व ग्यापुगु फासिवाद प्रवृत्तिया विरुद्ध छपा जुयमः गुलि सः थ्वयकः दिल ।

ता ई तक म्हाय सुख मदयकः चवनयमःसेलिं २० जून १९३३ या दिनसं मस्कोया लिबक आर्चाबसकोज (Arenangels Koje) धाय्गु थासय वयकलं प्राण त्वःतः दिल । वयकया सीम्हा मस्कोया केमहनौर (krem inauere) य् तय यंकेला ।

क्लारा जेट्किन अन्तरराष्ट्रिय कम्युनिस्ट आन्दोलन व अन्तरराष्ट्रिय महिला मजदुर आन्दोलनया छम्हा न्हिथानय् वहम्हा न्ह्यलुवा खः । धात्थें धाय्गु खःसा 'छम्हा महिला मजदुर आन्दोलनया छम्हा न्ह्यलुवा व 'पूँजीवादी महिलावादी' स्वपुकुंया स्यलाम्हा आलोचक व विरोधी खः ।

भीगु नगर सफा नगर सफाइ भीगु गौरव

तिनातःगु लुखा

प्याखंम्वःत :

पसल्यानी, मनु, पाले, सानी, राम, मान, पुलिस, माया

विजय मल्ल

तिनातःगु लुखा

व मेमेगु छद्माः प्याखं



- विजय मल्ल

(न्हयःनेसं पसः दुगु छें ।

श्वया हे पिने फः दु व बिजुलीया लट्ठा दु । मत
च्यानाचवन । बहिनिसिया च्याताः गुताः तिया ई सतक सुंसां दं ।
लुखाया क्वसं फलय हासा व चीगवःगु तखता दुगु दराजय
चुरोट, ग्वय आदि मियाचवम्ह छम्ह मिसा दु ।

व पसः तीत सनाचवंगु जुइ ।

खिचां ऊगु, मोटर ब्वाकूगु मोटरया हर्न व विभिन्न
प्रकारया सः बराबर वयाचवनी । सतकय छम्ह निम्ह मनूत
उखेथुखे वये-वने यानाचवंगु दइ ।

छम्ह मनू पसल्यानीयाथाय वनाः चुरोट न्यायेत्यनी ।)

पसल्यानी : गुगु चुरोट धयादिसँ ! मेगु भिंगु फुक्क ला बाकसय
स्वथने धुन । धयादिसँ रे.... छु जिगु ख्वाः जक त्वाल्ल स्वयाचवना

दियागु ! चुरोट माः लाकि म्वाः ! मखुसा श्व नं स्वथना
छवयेत्यल ।

मनूः (म्हिचा वास्या वास्या यानाः, अजू चायाः) सुनां बगली
मारय यात जुइ का धिबछः ध्यबा हे मदु का ! थन हे
म्हिचाय तयागुहे नकतिनि हिलागु भिकार्का वंगु नोट । गज्याःगु
गजब, नकतिनि हिलागु ! बस दिक्थाय सुनां काल जुइ ?!
(म्हिचाय वास्या वास्या यानाः पुत्तु पुइकाः स्वयाचवनी ।)

पालेः छु स्वयाः अथे पुत्तु पुइका आः भाइ, बगलीमारां कया
यंकेधुंकाः । थौकन्हय्यागु जमाना थथे हे खः । धर्म- कर्मयात
सकसिनं हाकु तिलाछ्वये धुंकल भाइ । बीफुसा ब्यु रे
सानी, छपु चुरोट त्याये बियाछ्व । ईमानदार जूसा कन्हय
ध्यबा पूवइ । गथे भाइ ! (न्हिलाः)

मनूः छपु चुरोटय छु जिं ईमान मी ला !

पालेः (न्हयुन्हयुं) ईमान धयागु छपु हे चुरोटय ला मियाछ्वइगु
खः नि भाइ, छगू हे खँय मियाछ्वइ । लुँ लनेगु सछिक्कः
मनू लनेगु छक्कः धाइ । गथे ? (हानं न्हिली ।) का सानी,
छं ला चुरोट फुक्कं स्वथने धुंकल । विश्वास मन्त ला
वयात?!

मनूः म्वाःल म्वाःल, जितः चुरोट म्वाःल । गज्याःगु मचाःगु
जुइ !

पसल्यानीः गथे ल्या छि नं, म्हस्य नि तास्यूम्ह मनूयात जिं अथे
पत्याः यायेफइ ला चुरोट !

पालेः म्वाःल म्वाःल, पत्याः याये मते, पत्याः याये मफुसा
पत्याः याये म्वाः । पत्याः हे यायेमाः धयागु छु दु व ! छं
पत्याः मयात म्वाःल का । छु, मनूया ख्वाःपाः खनेवं हे
न्हयाम्हेसितं पत्याः यायेमाः धयागु दु ला ! थन मनूतयूत ला
पत्याः हे याये फइ मखु ।

मनूः छु धयादिया !!?

पालेः सज्जन - दुर्जन म्हसीके थाकु, भाइ । सुयागुं कपालय
चवयातःगु दइ मखु थें श्व सज्जन, श्व दुर्जन धकाः । छितः
श्व सानीं पत्याः याये मफुत, जाबा छपु चुरोटय । (न्हिली ।)

मनूः छु गिजय यानादियागु जितः ! जितः यःसा पत्याः या,
मयःसा पत्याः याये म्वाः । छितः छुक्रिया वास्ता ! छि थःगु
थासय सुम्क चवनादिसँ ! करपिनि ध्यबा तनाः गज्याःगु
.....!

सच्छि व खुइछगूगु स्वप पौ. ब:छि पौ(पाक्षिक)

पाले: छु धया, भाइ, छं ! सुम्क च्वँ छिगु ध्यबा तंगु हे मखु ।

मनू: छु, जिगु ध्यबा तंगु हे मदु ?

पाले: छु प्रमाण दु, छिगु ध्यबा तंगु ! थन ला श्व सानीलिसे छ्या: यायेत भा:म्ह का छि । जि पाले ख: । थय्क स्वयेवं मनू म्हमस्यू ला जिं ! भासँ, भासँ !

मनू: जि श्वलिसे छ्या: या: व:म्ह जुल का असा मखु ला ?!

पाले: ख: । यक्वसित छ्याना छ्वयेधुन जिं न्हापा नं, सिल ला छिं !

मनू: जि श्व बुरिलिसे छ्या: या: वयाम्ह ला ?

पसल्यानी : छु धया..... जि बुरि ! छु थें जा:पिं ल्याय्महत यक्व खनागु दु जिं । अप्व: त:धं जुया: खँ ल्हाये मते ! सुरु सुरु थ:गु लँ लिना हँ !

मनू: बुरियात बुरि धया का ! मेगु छु धायेमाल ले आ: !

पसल्यानी: अज अप्व: जुया: खँ न्हानाचवनागु ला ? छिमि मां बुरि, छिमि बज्ये बुरि का ! छु जि बुरि ला ! बरा भिक्रां दां तन धका: करपिन्त ठग्य या: वइम्ह का !

पाले: तनी का थज्या:पिनिगु भिक्रां वंगु नोट, गुळलें खंगुकुन्हु दु ला थें भिक्रां वंगु नोट ! छु मिखां स्वयाचवना, हँ भाइ हँ ! बरु फलं फल हँ ! श्व प: खालय् थिलकि जिं बाकी तये मखु, सिल ला !

मनू: गँवारत ! (पिहां वनी ।)

पाले: छु हे गँवार का ! न्यन ला, अ:ख: भीत गँवार हँ ! थज्या:पिं का थौकन्हय्या भीथाय्या भलादमी धा:पिं । भन्डेले छंगु छपु चुरोट पचय् याना वनेत्यंगु का । उकिं ला जिं छन्त बराबर धयागु, थज्या:गु एकान्तय् पस: तये मते धका: । जि दया: ला ख:, नत्र छन्त लुटय् याना यंकेत छु छु बेर !

पसल्यानी: गन त: वने ?!

पाले: न्ह्याथायसां त:हँ ! थन छ छम्हेस्यां पस: त:व:गुलिं भुजिं भुने थें भुं वयेगु यायेधुकल । थथे हे छम्ह निम्ह मेपिसं नं पस: त:वइ । अले ला श्व थाय् पस:या पसलं जायावइ । जिं थथे जुइके बी मखु । हानं गज्या: गज्या:पिं मनूत वइ ! छु सुरक्षा जुल श्व छँया ! थनया सुरक्षाया भाला जिं कयातयागु । अथें हे ला न्ह्याम्ह नं प:खा: पुला: दुहां वयेत दाउ स्वयाचवनीगु ।

सानी: जि गन वने ले ?

पाले: यन्थाय हँ ! तर थन पिने चवने मते । छन्त नं थन दुने दुहां वनेगु रहर जुयावइ । अले मखंक दुहां वने मास्तिवइ ।

सानी: मव: जित: ।

पाले: मव: ?! गजबगु खँ ल्हात छं ! छं त:क्व: सुला: सुला: श्व

लुखादुने स्व:गु जिं खनागु दु । श्व ता: न्ह्याबलें छाय् ग्वयातल, अन दुने छु दु, व थाय् जक द:सा गुलि न्ह्याइपुक्क जीवन हनेदइ ! छु, थुज्व:गु लोभ मतिइ दना मव: ला छन्त, का धा सा ...

सानी: जि थें जा:म्हेसिके नं थज्या:गु लोभ वइ ला ! गज्या:गु खँ ल्हानादियागु छिं !

पाले: मव:सा बांला: । तर छंके वयेफु । लोभ धयाम्ह की न्ह्यागु स्यंगु, धवगीगु मनय् नं बुया वयेफु । उकिं जिं धयागु, अथे लोभ जुइन्हय: हे छं श्व थाय् त्व:तेमा: । श्व थाय्या सुरक्षाय् जिं थ:गु जीवन फुकेधुन । सुयातं जिगु विश्वास मदु । अझ जि श्व न्हू - बिचा: तइपिं खना: ला तसकं थारा न्हू । (रामबहादुर धेधे चुचुं दुहां वइ ।) रामबहादुर ! हाकनं छ छाय् थन वयागु ? जिं गबलें वये मते धयागु मखु ला हं !

राम: छिगु स: ताया: वयागु का ।

पाले: थथेभनं घिच्चय् याना: ला पला: थातय् मदु ।

राम: छि याक:चा जक जुइ धका: मन तयेत वयागु, पासा जूवयागु ।

पाले: थुज्व:गु पहलं जिमि पासा जूवयागु ! छु वेंय् जुल ला छ !

राम: छु जि छिम्ह पासा जुइ मफइ ला ! छु जुल धा:सा छित:..... श्व ज्यान छिगु लागि हाजिर दु । छिगु ग:प: या द्य:ने जिगु श्व ग:प: । अथे तये मफुत धा:सा जि रामबहादुर खिचा का खिचा, थुल ला छिं !

पाले: थज्या:म्हेस्यां जित: साथ बीगु ! थय्क जक दवा: सा भिकु लिहां वनी । जिगु रक्षा याइम्ह रामबहादुर । जित: मा:गु मदु थज्या:म्हेसिगु साथ । थनं भायेकि ! सानी छ नं थ:गु सामान ज्वना: वनाछ्व ! कन्हेंसनिसें थन छंगु पस: बन्द ।

राम: ख: ख:, पस: बन्द । अज्या:गु ग्वय्- लवं सुनां नइ !

पाले: रामबहादुरयात अय्ला: त्वनेमा:गु दु मखु ला ! अय्ला:गुलु

राम: ख:, अय्ला: त्वने मास्तिवल । रामबहादुरयात अज्या:गु किचिकिचि, थाकाथुकु मय: ।

पाले: हाले मते रामबहादुर ! छ हा:गु तालकि मेपिं अय्ला:गुलुत नं वयेत छु बेर ! अले ग्व:म्हेसित जक छ्यानाछ्वयेगु ? का

सानी

राम: व मावय्चरी कान्छीचां थौं जित: स्वात्त हे ठग्य यात का ! छतकाया थुलीचा अय्ला: तयाब्यूगु । अज्या:म्ह ! वयागु भत्तीइ ला जि आ: वने हे मखुत ।

पाले: गुलि घिच्चय् याये मास्तिवल ले छन्त ! फछि ला ! अले

सच्छि व खुइछगूगु स्वप पौ, ब.छि पौ(पाक्षिक)

सतकय् तिप्यना: द्यनेत ला !
 राम: सतकय् ला द्यनेगु नि, कला: चां फल्चाबाय् याना बिसेंलि ।
 व जाँठीया नामय् जक जिं छें पितिना ह्येफइ ला !
 वयागु नामय् छें च्वयाबिया, बूँ फुकं च्वयाबिया, सरकारं
 सर्वय् काये मफयेमा धका: ... का व हे मावसिकिनं धका:
 सर्वय् कयाबिल । पाले दाइनं बेस यानादिल । छिं ब्याहा
 मयासैं बेस यानादिल ।
 पाले: ख:, फुक्क अय्लाखं हा, पारापारा हा !
 राम: पाले दाइ तं चायादी मते ले, जि छँ हे दु धका: । ख:,
 मावय्सिकिनं लुटय् यासानिसैं सतकय् हे जिगु छें । इ थथे
 याना: थन ग्व:तुलेगु का
 पाले: स्व स्व रामबहादुर, श्व लुखाया न्ह्य:ने द्यने मते !
 राम: का । (दना: फ्यतुइ ।)
 पाले: फ्यतुइ नं दइ मखु सिल ला ! स्व रामबहादुर छन्त नं श्व
 छँया विषयय् सीकेगु रहर जुइधुकल । का आ: जिं मानय्
 याये मखु, हँ हे हँ थनं ! का सानी, छ न हँ हे हँ !
 सानी: गन वनेगु !
 पाले: गन वने मास्तिव: हँ ! “गन वनेगु” अ:ख: जिके धका:
 न्यनाच्वन । छ न्हापा गन वनेगु यानाच्वना अन हे हँ !
 राम: ख:, आर्यघाटय् हँ ! मसानय् वना: ग्व:तू हँ ! रानीपोखरीइ
 वना: क्वब्बा: हँ !
 पाले: दथुइ छं अथे प्वाक्क नवाये मते रामबहादुर, ककु तिना:
 छन्त न हँथ्यंक हुत्तय् यानाबी । खं ला जिगु लप्पु !
 (मानबहादुरया प्रवेश । पालें वयात खनी ।) छाय् वयागु
 थन ! उखे हे वना: च्वहँ ! जिलिक्क च्वंवयेगु मखु ।
 मान: जि थन श्व मतया जलय् आख: ब्वने धका: वयागु । थन
 मेथाय् सिबय् तुय् । जिं छिकपिन्त छुं मछिंके मखु थें
 बा: !
 पाले: छु छं छँय् च्वना: ब्वने मफु ला ? छु छं आख: स: धका:
 जिमित क्यंवयागु ला थन ?
 मान: बा:, छिं सि हे स्यू जिगु आर्थिक अवस्था, श्व ज: छाय्
 सितिकं छ्वयेगु ! चकंगु सर्ग:या क्वय्, सिचुगु व शान्तगु
 थासय्, कविता ब्वने न्ह्याइपु बा: ।
 पाले: छु घरी घरी जित: बा: धयाच्वनागु ! छु छन्त बुइकाम्ह
 अबु ला जि ! जित: मय: थज्या:गु खँ ।
 मान: छि जिमि बुराबा: ख: । थन श्व सफुतिइ सिद्धिचरण कविं
 काय्यात धा: थें “छिमि अबुयाके ध्यबा मद्दु” धका: उसि
 चाया: छिं क्यनेमा:गु मद्दु । जिं छिगु सम्पत्तिइ दाबा
 याना: धावा याये मखु थें ! ग्यानादी म्वा:, जिं छिगु नुग:
 कायेफु । तर बैगुनयात चाइँ मिया प्रचण्ड रापं क्वयेका:

भस्म या: थें जिं यायेफु । स्वयादिसैं ! जि छिगु नुग:
 नायेकेत वयागु, छ्वयेकेत मखु । कवि देवकोटां धा: थें
 अतीतया घालय् मलम पाका: सेवा यायेत वयागु ख: ।
 पाले: मा:गु मद्दु जित: छंगु सेवा, थुल ला मानचा ! खालि श्व
 छँया ज:ख: जक मवयेवं गा: जित: । अय् सानी छु
 छ द्यनेगु ला ! हँ धया !
 सानी: (न्हयलं चायेके थें याना:) गन वनेगु जि ?!
 पाले: छु गन वनेगु ? ल्हा: ज्वना: थनायंके माल ला ! जि ला तं
 मभिं, सामान फुक्कं वांछ्वयाबी न्हँ !
 मान: बा:!.....
 पाले: हाले मते धया छ !
 मान: जि थन “जाऊँ गोमा त्यस शैलीमहाँ, पीर कुनै पनि उठ्दैन
 जहाँ” धयागु लुमंका: वयागु ला छि हे हालादिल, शान्ति
 भद्ग जुइक । वयात अन हे च्वने ब्यु रे, छु स्यंकूगु दु
 वं !
 राम: शान्ति भद्ग जुइक.....
 पाले: ख:, छु स्यंकूगु दु वं ! छ धका: थुज्व:पिं मिस्तलिसे भ्यलय्
 पुनाजूसां इज्जत वनी धका: ग्याये म्वा:, जिपिं ला ग्यायेमा:
 थुल ला !
 राम: सलिंचाय् ल: तया: सिनावंसां जिल ।
 पाले: हाले मते रामबहादुर !
 मान: छि थें जा:म्ह बुरा नं अथे ग्यायेमा:गु ला ! छु व जक छि
 खना: मग्याइ ला ! छाय् मग्याइ व- छित: सज्जन भा:पा:
 ! छिं ला मानय् यायेमा: वयात - न्यनादिसैं,- महाकविं
 धा:गु दु - “मनूया म्ह हे छग: देग: ख: । व देग: दुने द्य:
 विराजमान जुयाबिज्याइ ।”
 पाले: छं जित: अर्ती ब्यवयागु ला, उपदेश ब्यवयागु ला थन ?!
 मान: मखु, छिगु नुग: नायेकेत वयागु ।
 पाले: जिगु नुग: नायेकेत वयागु, छ थें जा:म्ह फुच्चां !
 मान: ख: ।
 राम: छं वय्क:यागु नुग: नायेके फइ मखु । बाजी तयेगु ला
 जिनाप ! का, गुलि गुलि बाजी तयेगु ? का वा, बाजी
 तये । छु तयेफु, श्वं जिनाप बाजी ! कानाकौडी मद्दु जुइ
 खल्लीइ ! (न्हयुन्हयुं धेधे चुचुं हाकनं फ्यतुइ ।) बाजी तयेगु
 ला जिनाप ?!
 मान: ख: । जि थुके बुइ ला ! त्याये नं ला फु ! तर त्याइ-
 बुइनाप जित: छुं मतलब हे मद्दु । थुल ला बा: ! तर श्व
 तालय् तालं ग्वयात:गु दु । गबलय् तक्क व ता: चाली
 मखु अबलय् तक्क श्व थासय् न्हूगु युगं फपुले फइ मखु ।
 राम: न्हूगु युग, हँ हँ !

सच्छि व खुइछगूगु स्वप पौ. ब:छि पौ(पाक्षिक)

पाले: छु धया ... ? जिगु छ्यनय् तालं गवयात:गु दु !
मान: ख:, थुइकं मथुइकं छि थ:म्हं हे तालं गवयादीगु दु । व ता:
चायेकादिसँ, अले स्वयादिसँ, गुलि न्ह्याइपुसे च्वंगु ज: !
पाले: छं जित: छुं मस्यू धका: थुइकागु ला ! वेंय् !
मान: मखु, मखु । छित: जिं प्राचीनताया पुजारी धका: म्हसीका
तयागु दु । बल्ला:गु स्तम्भ, धिसिला:गु सालिक छि ।
पाले: छु अथे थथे धाधां थव ता: चायेके बीके त्यानागु ला ! थव
छेंया लुखा जि मसीतले चाली मखु । यक्व दँ न्ह्यवनिसँ
थवयागु रक्षा याना वयाचवनागु दु जिं । जिगु बिचा: छु
दु न्यँ, व छिपिं थें जा: पिसं न्ह्याक्व हे न्ह्याथे हे
मययेकेमा, जि थौतक थन चवनाचवनागु दु । अभ्रं नं
उकिया उपयोग यायेगु जिं स्यू । आ: थुल ला- थव ता:
छाय् चाली मखु !
मान: छिं छुके तालं गवयादियागु दु थव छेंयात..... मखु थव
छेंया ज्या छ्यलेगुली । थन जुइ मफइगु छु दु ! छगू
बांला:गु ब्वनेगु थाय् चायेके फु । कल्पना यानादिसँ, गुलि
मस्त थन ब्वं वइगु जुइ, ब्वॉय् जुइगु जुइ, म्हितीगु जुइ,
थव छँ हे म्वा:म्ह थें जुइगु जुइ ! आ: ला थव छँ सीम्ह
लाश थें । बा: कल्पना यानादिसँ, अस्पताल जूगु जूसा
नर्सत गुलि बलुहं न्यासि जुइगु जुइ गुलि बलुहं
पाले: जिं कल्पना याये मफु, जिं छाय् याये ! थव छेंया जि
मालिक ख: । थव छेंया मालिकत यक्व दु, जिं सुं
मालिकयात नं म्हमस्यू । जि मालिक (न्हिली)
मान: अथेथथे कल्पना याये, थव छँदुने अन्यायपूर्ण अपराध
जूगु दइ, थुकियात त्वपुइत छु थव छँय् ताल गवयात:गु ला
मखु ला ? थव खँ पाले मसीवंतुं छु पाले जक थुकिया दोषी
मजुइ ला !
पाले: (तसलं) छं ख:गुं मखुगुं दोष बियाच्वंगु दु जित: । म्हुतु
सम्हालय् या छं ! जिं थ: हे काय् जूसां बाकी तये मखु, ग:
प: तिया: स्यानाबीफु जिं । सिल ला !
मान: अथे जागय् जुयादी मते रे बा:, जिं ला कल्पना जक यानागु
का । छपु अंग्रेजी - बाखं दु, राक्षसयागु- तसकं घत
लगय् जूगु, बांला:गु । राक्षसं थ:गु भरायखागु छँय् छन्हु
मस्त यक्व हे म्हित: व:गु खन थें । वं तं पिकया: व
मस्तयत्त छँय् दुने मवयेकेत प्यखेरं तत: जा:गु प:खा: दना:
अज्व:गु हे लुखा नं तिनाबिल । तर उगु दँया वसन्त
ऋतुइ छुं हे सिमा-स्वामाय् स्वां महवल । चखुं-बखुंतय्सं
मधुर स: नं न्यंक: मवल । राक्षस तसकं अजू चाल, व
दिक्क नं जुल । तर क्यबया कुनय् चिकिचाकूगु थासय्
स्वां हवयाच्वंगु खन फल सयाच्वंगु खन । थुकिं याना:

वयात तसकं हे अजू चाये मायेका बिल, वं उगु सिमाया
लिक्क वना: स्व: वन । प:खा: पुला: मस्त दुहां वया:
म्हिताच्वंगु खना: स्व:बलय् अपि दक्व बिस्युं वन ।
राक्षसयात थ:गु भूल महसूस जुल, प:खा: थुनाबिल, लुखा
नं चायेका बिल । अले न्ह्याबले स्वामाय् स्वां हवल,
सिमाय् नं फल सल ।

पाले: छं थज:गु हे बकंफुस्तु बाखं न्यंका: लुखा चायेकेगु सुर मखु
ला ? जिगु धर्मयात डगमगय् याये मास्तेव: का मखुला ?
(छम्ह पुलिय् लम्कय् जुया: उखेपाखे दुहां वइ ।)
पुलिस: न्यनादिसँ सा, छिकपिं थन गुइलनिसे दी ?
पाले: न्हाच: निसँ हे दु । छाय् ?
पुलिस: थुखेपाखे सुं मनुखं प्यदँ दुम्ह मचा बुयायंकूगु खं ला, थव
हे घौ बाघौ न्ह्य: ?! मनुखं हाकुगु पाइन्ट न्ह्यानात:गु दु,
मचां चाहिं रंगीन गंजी व कट्टु । छम्ह विधवा मिसाया
याक: काय् खुयायंकल । छिकपिसं खं ला ?
मान: अहँ, जिमिसं ला मखना ।
पुलिस: सुनानं खन धा:सा तुरुन्त पुलिसयात खबर यानादिसँ !
(हाहां माया दुहां वइ ।)
माया: का रे का, जि काय् सु पापी खुयायंकल ! सु मभिंम्ह दुष्ट
यंकल बाबा
मान: (न्ह्य:ने ववं) माया निनि, छि ला ! छु, राजु खुयायंकल
ला !
माया: ख: बाबु, जिगु ला नांचा हे दुनीन बाबु ।
मान: नकतिनि पुलिस थुखे हे मामां व:गु । जिमिसं ला सिहे
मस्यू । गज्या:पिं बेइमानत ! आसे, जिपिं नं मालेत वने ।
खवयादी मते !
माया: थन हे गनं छँय् तालं गवया: कुनात:गु दु हँ ! का रे माला
बीमाल बाबु, मखुसा जिगु प्राण हे वनी ।
मान: माया निनि, अथे कल्पना यानादी मते । थुखे वया: फ्यतुना
दिसँ । छिं थुज्व:गु चान्हय् गन वना: मालेगु ?! बरु जिपिं
पुलिसत ज्वना: मा:वने ।
माया: घौ बाघौदुने लुइके मफुत धा:सा स्याना: वांछ्वइ जिमि
राजुयात इमिसं । का रे याकनं यायेमाल बाबु ! (पिवा:यात
खनेव) दाइ).....
पाले: दाइ ! सु छ ?
माया: जि माया, केहँयात म्हसीके मफुत ला छि ! जि मायायात
म्हसीके मफुत ला छि ! जि-राजुयात निम्ह प्यम्ह मनुतय्सं
छँ ह्ययेका: खुयायंकल । जि वयात हे मामां वयागु । जि
याक: काय्, जि सुयागु भरय् म्वाये आ: !
पाले: जिं म्हमस्यू छन्त, थन न्ह्याम्ह व:सां नाता भा: पिया:

सच्छि व खुइछगूगु स्वप पौ, ब.छि पौ(पाक्षिक)

वइगु । जि सुयां सुं मखु । थव निस्सार जगतय् जि सुयां सुं नं मखु ।

माया: ए, अय्सा अय्सा दाइ ! जिगु दुःखया इलय् नं लुमंके मास्ते मवल ?! जि-काय् तनाचवंगु दु, छितः थः केहैयागु वास्ता हे मदु । जिलिसे तं वःगु मतंनि लाकि !

पाले: गज्याःगु खँ ल्हानागु ! जितः छं हे लुममं । छु, लँय् जूपिं दक्वनाप थःथिति धाधां, तताकेहँ धाधां वनेगु ला ! छिमि काय् तंगु दुसा माः हँ ले ! छु नयेदइ धकाः थन चवंचवना !

माया: दाइ, अथें तं पिकायेके मते जितः थौं । अथें नं जिगु नुगः ख्वयाचवंगु दु, उके नं चिमल्ता तने मास्तिवल ला हाकनं ! छिं ल्वःमंकल, छिं ल्वःमंकि माया मदसा ! जितः नं छु वास्ता मदु । थौं जि-काय् तनाचवंगु दु जिगुजिगु..... जिगु.....नुगः ख्वयाचवंगु दु, जितः मदत बीगु पल्सा छि....छि

मानः ख्वयादी मते निनि, बाःया दुने थः हे मदु !

पाले: छु जि जिके हे मदु ?! सिल ला जि जिके हे दु, जि जिके दइ । जि थः दुने हे उकुस मुकुस जुयाः चवने, थः दुने हे थः त कुने ।

माया: जिमि भाःत मन्त । जिं सुयाथासं वनाः ल्हाः फः मवना । स्यू जिं, छिगु इज्जतय् हाकुगु चातः चवनी धकाः छिं छिम्ह जिलाजंया ख्वाः तकं स्वया मदी । अःखतं वय्कःयात छिं सराः बियादिल । छिं अथे हे सराः ब्युब्युं वय्कःयात स्यानाःतुं त्वःतादिल । अज्याःम्ह पापी छि । अयनं दाजु धकाः थौं ल्हाः फःवया, जितः म्हसीके ल्वः मंका दिल ! स्वयादिसँ दाइ, थवया पापं छितः छु जक मजुइ ! छितः छु जक मजुइ ! धात्थें छि थम्हं हे म्हसीकाः सिनावने माली छ ।

पाले: ज्यू सराः ब्यु, जि थःत हे ल्वः मंके मास्तेवः, थुल ला ! छिपिं थन आः थव छैन्यःने चवने मते ! थव छँया पिवाः खः जि, हल्लाखल्ला यायेगु थाय् मखु थव !

माया: (अकस्मात् लुखापाखे स्वस्वं) तालं ग्वयातःगु छँदुने जि-राजुयात कुनातःगु दु धाःगु छँ थव हे खः । थव हे छँ खः । थव हे छँ खः । (लुखापती न्ह्यान्हयां) थव हे छँ जि-काय् कुनातःगु दु ।

पाले: लुखापती वने मते न्हँ ! (न्ह्यःने वँव मायायात पनी ।) मखु, सुयागुं छँ मखु थव ।

माया: जितः पनीम्ह सु छि ! जि-राजु, जि-काय्यात थन हे दुने कुना तयातःगु दु । चायेकि छँया लुखा ! जिगु मनय् मचा थन दुने हे कुनातःगु दु । चायेका बियादिसँ छँया लुखा ! जिगु

बाल्यकालयात कुनातःगु दु थन । (पुलिस नं अन थयंकः वइ ।)

पाले: जबरजस्ती याये मते न्हँ, जिं मिस्तय् नं बाकी तये मखु न्हँ !

मानः बाः, आः वय्कःया मचा अन कुनातःगु दु धासँलि छिं मचायेकुसे सुख ला ! चायेका दिसँ लुखा, दुने स्वयेब्यु ! छिगु हक मदु, थव लुखा तिनातयेगु ! अन छु छु दु, दक्व स्वयेब्युह फुक्कसिनं सीकेब्यु दक्वसिनं मायेकेब्यु । थव छँया लुखाया ताःचा बियादिसँ जितः !

माया: छु दाइ, जिं थःगु बाल्यकाल नं स्वये मदुगु ला ! जि-काय, जि-राजु थन हे कुनातःगु दु । छु वयात नं जिं स्वये मदु ला ! गज्याःम्ह पापी छि ! जि थःगु थःछँय् दुहां वने मदु ला !

पुलिसः छुकिया हल्ला थव ! छु जुल ? छु जुल ?

पाले: जिं सुयातं दुहां वनेबी मखु थव छँय् । थी मते जिगु ताःचाय् !

पुलिसः चायेका बियादिसँ लुखा, अय् हल्ला यानादी मते ! वय्कःया तंम्ह काय अन दुने दुसा चायेका बियादिसँ रे !

रामः पाले दाजु, छुकिया ग्यायेमाःगु, चायेका बियादिसँ सा लुखा !

मानः बाः, छिं चायेका मदीसा जिं चायेका बी ! छिम्ह काय चायेका बी, ताःचा बियादिसँ ! छँया उपयोगितायात, छँया विकासयात छिं तालं ग्वयातये दइ मखु । छि थें । जाःम्ह पुलां बिचाः याम्ह मनुखं पनेफइ मखु । माया निनि, भासँ भीगु थः छँया लुखा छिम्ह भिंचां चायेका बी। (मानबहादुरं पालेया ल्हातं ताःचा लाकाकाइ ।)

पाले: स्व माने, छं चायेके दइ मखु व लुखा

माया: चायेकि बाबु व लुखा, जि तंम्ह राजु जिं अन हे माले ! जि-राजु ! जि-राजु ! (पिवालं ताःचा ज्वनेगु कुतः याइ, पुलिस वयात पनाबी ।)

पाले: अय् माने, छ जिमि काय हे मखु, छ फय्गं ! सय् त्वःतादिसँ, पुलिस दाइ ! (मानबहादुरं ताः चायेकी ।)

माया: जि-राजु ! जि-बाल्यकाल ! (व दुहां वनी ।)

पाले: छु जुल जितः ?! छु म्हास ला ! थव दक्व छु ! म्हास..... म्हास (बँय् ध्याक्क फयतुइ ।)

- (धकिं)

चव-ई : ने.सं. ११०० जलागाः १३ सिबय् न्ह्यः

(साभार : 'भी' लय्पौ दें २५, थयल्याः १९१, ने.सं. ११०२ बछला)

खप नगरपालिकाया ज्या भवः त

खप नगर प्रमुख प्रजापति धुलिखेल अस्पताल स्वः भाल

असार १७ गते



खप नगरपालिकाया प्रमुख सुनिल प्रजापतिया न्ह्यलुवाय खप नगरपालिकापाखं चाय्कः तःगु खप अस्पतालया प्रतिनिधिपुचः मंगलबार धुलिखेल अस्पताल स्वःभाल । उगु पुचलय खप नगरपालिका वडा नं ९ या वडाध्यक्ष रबिन्द्र ज्याख्वः, खप अस्पतालया निमित्त डाइरेक्टर मजेश प्रताप मल्ल, स्त्रीरोग विशेषज्ञ डा. युजिन श्रेष्ठ, एमडिजिपी डा. निर्जना बजिक्वै, जिन्सी शाखा प्रमुख बिनोद दनेखु नपांया पुचःता धुलिखेल अस्पतालया कार्यकारी निर्देशक डा. रामकण्ठ माकजुं अस्पताल लसकुस याडः द्यूगु खः । चाहिलय धुंक जुगु छलफल ज्या इवः सं नगर प्रमुख प्रजापति जुं खप अस्पताल चाय्कागुया तातुना काडः दिसे अस्पताल न्हिं दृष्टिम्हा स्वयो अपः बिरामी पिनिगु उपचार सेवा याडः वगू खाँ काडः दिल ।

खप विश्वविद्यालय निःस्वाडः मेडिकल कलेज चाय्केगु तातुनानपां खप नगरपालिका मः काथंया भौतिक पूर्वाधार दय्कः वयागु खाँ नपां धुलिखेल अस्पताल फुक्क काथंया स्वास्थ्य सेवा ब्यू ब्यू वगु नपां अस्पताल ब्यूगु सेवां जनताता स्वास्थ्य उपचार काय्ता अःपुगु खाँ काडः दिल ।

खप नगरपालिकां स्वास्थ्य लागाता हृदाय तयो ज्या साडः वगु नपां अस्पतालया सेवा सुविधा अझ बांलाक यंकयगु कुतः जुयो च्वंगु खाँ ब्याकसे थुगुसि निसें हे अस्पताल सिटिस्क्रान तय्ता मःगु ज्या याय्धुगु खाँ नपां वयकल जनताता दांक, भिंकः, अःपुकः स्वास्थ्य सेवा वियागु छगू जक तातुडः, खप अस्पताल

चाय्कागु खाँ व्याक दिल ।

धौख्यः अस्पतालया कार्यकारी निर्देशक डा. माकजुं अस्पताल दःगु उपचार सेवा व स्वास्थ्य लागाय धुलिखेल अस्पताल याडः वगु ज्याया खाँ काडः दिसे धुलिखेल अस्पताल मःगु काथंया लिधंसाय सरकारी अस्पताल नपां मंकः ज्या याडः वयागु खाँ काडः दिल ।

वयकल काठमाण्डौ विश्वविद्यालयपाखं धुलिखेल अस्पताल २२ हजार स्वयो अपः जनशक्ति ब्वलांकय् धुंगु दायें २० हजार स्वयो अपः शल्यक्रिया याडः वयागु खाँ व्याकसे गरिब जनताता अःपुक भिंगु, बांलागु स्वास्थ्य सेवा बियागु तातुडः अस्पताल निःस्वाडागु खाँ व्याकसे धुलिखेल व खप अस्पतालया दश्वी जनस्तरया स्वापु तयो हज्याय्मः धायो दिल ।

छलफल याय धुंकः नगरप्रमुख प्रजापतिजुं अस्पतालया थी थी सेवात स्वयो दिल नपां वयकपिनि दश्वी उपहार न कालबिल जुल ।

सुचुकुचु

असार १५ गते

खप नगरपालिकाया बःछिया छकः मदिक न्ह्याकः वयो च्वंगु सुचुकुचु ज्या इवः श्वपालि असार १५ गते खप नगरपालिका वडा नं ४ या मंगलतीर्थ परिसरय सुचुकुचु ज्या इवः न्ह्याकगु जुल ।



नगर प्रमुख प्रजापति व धौख्य नगरप्रमुख ब्याञ्जु नपालात

असार १७ गते



खप नगरपालिकाया प्रमुख सुनिल प्रजापति व धौख्य नगरपालिकाया प्रमुख अशोक कुमार ब्याञ्जु नपा लाडः पालिकापाखं सम्पादन जुइगु ज्या नपां थःगु अनुभवत काल बिल याडः दिल ।

प्रमुख प्रजापति, वडाध्यक्ष रबिन्द्र ज्याख्वः (९) नपांया पुचः ता थःगु कार्यालयसं लसकुस यागु जुल ।

उगु नपालायगु इवल्य नगर प्रमुख प्रजापतिजुं खप नगरपालिकां शिक्षा, स्वास्थ्य, सम्पदा ल्यंकः म्वाकः तयगु, सुचुकुचु थजगु लागाय् जुयो च्वंगु ज्या इवः या खाँ काडः दिसे खपया जनप्रतिनिधि कर्मचारी व स्थानीय जनताया छगू तुं मनं हज्यागुलिं अः खप दे हज्याडः च्वंगु खाँ ब्याकः दिल ।

ब्वनामिपिन्ता शैक्षिक ऋण व छात्रवृत्ति बियो चव्य थ्यंकया शिक्षा ब्वनय्ता ग्वाहाली याडः वयागु नपां नागरिकपिनिगु मतिकथं नगरपालिकां सेवा प्रवाह बियो वयागु खाँ नं वयकलं काडः दिल ।

वहे इवल्य धौख्यः नगरपालिकाया प्रमुख अशोक ब्याञ्जु

नं धौख्यः नगरपालिकां शिक्षा, स्वास्थ्य, पर्यटनय् बांलाक हज्याडः वयागु प्राकृतिक काथं तस्कं बांलागु नगरपालिका खः धायोदिसे थुगु नगरपालिकाता विश्व स्वास्थ्य संगठनं नेपःया न्हांगु स्वस्थ शहर काथं क्वः छिडः सिरपा नपां ब्यूगु, त्वनय्गु नाः गरिबी निवारणया लागाय दिगो विकासया तातुना पूवांगु खाँ काडः दिल ।

धौख्य नगरपालिकां धुलिखेल अस्पताल व काठमाण्डौ विश्व विद्यालय दुनय चाय्कः तःगु मेडिकल कलेज निःस्वानय्ता तहांगु ग्वाहाली याडागु खाँ ब्याकसे प्रमुख ब्याञ्जु नगरपालिकां ९६ प्रतिशत जनताया छँ छँ त्वनय्गु नाः इय फयागु खाँ काडः दिल ।

नागरिकपिसं काइगु फुक्क सुविधात डिजिटल दयकेगु खाँ हछ्याडागु धायोदिसे वयकलं धौख्यः नगरपालिकां नगरया भौतिक पूर्वाधार विकास नपां नपां सामाजिक लागाय् नं दुतिडः ज्या साडः वयागु खाँ ब्याकः दिल ।

नपालाय धुकः नेगू नगरपालिकाया दश्वी पिथनात व 'मतिनाया चिं' कालबिल जूगु जुल ।

**नगरपालिका भीगु हे संस्था खः
इलयहे करपुल ग्वाहाली याय्नु**

खप नगरपालिकां मूर्त अमूर्त सम्पदा भिंकः वगु

असार १७ गते



खप नगरपालिकाया प्रमुख सुनिल प्रजापतिया मूपाहाँलाय् राष्ट्रिय कला संग्रहालय भक्तपुरया ६५कगु पलिस्था दिंया लसताय अन्तरक्रिया व क्षमता अभिवृद्धि कार्यक्रमया उलेज्यायासे वयकलं खपय ताडः वानिथें च्वंगु मूर्त व अमूर्त सम्पदात खप नगरपालिकां हदाय तयो संरक्षण व सम्बर्द्धन यायां वगु खाँ ब्याकसे राष्ट्रिय कला संग्रहालयं खपया महत्वता अज च्वजाय्केता ज्या साडः वगु खाँ ब्याक दिल ।

देशं दुनय व देशं पिनयया पर्यटक पिंगु मन क्वस्वायक छक मवसें मगागु गन्तव्य स्थल काथं हज्याडः च्वंगु देता रोम व हलिमयया म्वाडः च्वंगु संग्रहालयकाथं म्हासिइका पिब्वयो च्वंगु खाँ कुलः, दिसे वयकलं खप लायकुया न्ह्यकं इयो दरबार मल्लकालीन पहः काथं हे ल्हवनय-कानय व दानय्गु खाँ ज्यू धायो क्वः छिय घुंगुलिं छुं भाति प्राविधिक कारणं याडः उगु दरबार दानय्ता लिपा लाडः च्वंगु खाँ काडः दिल ।

बुँज्या, जनजीवन व नेवः संस्कृतिया संग्रहालयत जिल्ला-जिल्लाय चाय्केता नेपाल सरकारं बःयायमःगु खाँ ब्याकसे वयकलं खप नगरपालिकां लाय्कु लागाय ९९ चोक मुलय्गु पक्ष दःगु खाँ काडः दिल ।

प्रमुख प्रजापति जुं भाय, संस्कृति ल्यंकः म्वाक : तय्गु थजगु ज्या गथे खः अथेहे दय्क न्हूंगु पुस्ताता लःल्हायगु तातुडः ज्या साडः, च्वडागु खाँ ब्याकसे ब्वनामिपिन्ता सम्पदाया महत्व ब्वंकः ब्वडः थुइके बियता स्थानीय पाठ्यक्रम दय्क फुक्क ब्वनयकुथि ब्वंकय बियागु खाँ काडः दिल ।

ज्या इवः या सभाया नकीं नपां पुरातत्व विभागया महानिर्देशक सौभाग्य प्रधानाङ्ग जुं संग्रहालयता बांलाक तयता पुरातत्व विभागं याडः वगु ज्या इवः तः काडः दिसे पुरातत्व

विभाग या दुनयें लागू न्ह्यगू संग्रहालय मध्ये खपया कला संग्रहालयया मू विशेषता व महत्व दःगु खाँ काडः दिल ।

भक्तपुरया प्रमुख जिल्ला अधिकारी भरत मणि पाण्डे जुं खप दे कला व संस्कृतिं जःगु खुला संग्रहालय खः धायोदिसे थुकिता ल्यंकः, म्वाकः, भिंकः तय्गु स्वंगू तुं तहया मंकः दायित्व खः धायोदिसे मल्लकालया इलय निसैंया संग्रहालयया कला कृतिता न्हूंगु पुस्ताता लः ल्हा ल्हां यंकय् मःधायोदिसे खपया सम्पदा ल्यंकः, म्वाकः तय्गुलि खप नगरपालिका व स्थानीय जनताया तहांगु लाहा दःगु खाँ ब्याकः दिल ।

पर्यटन तथा नागरिक उड्डयन मन्त्रालयया सहसचिव डा. सुरेश श्रेष्ठ संग्रहालयं खप नगरपालिका नपां मंकः ज्या याडः वैगु दिनय् अझ बांलाकः न्ह्याकय्गु विषय लिफः स्वयो ज्या याय् मः धायोदिल ।

खपया कला संग्रहालय मेथाय्गु संग्रहालय स्वयो कलात्मक जूगु खाँ ब्याकसे वयकलं संग्रहालयं समाजया चित्रण याइगुलिं अज व्यवस्थित याय्गुलि बिचः याय् मः धायो दिल ।

इतिहासविद प्रा.डा. पुरुषोत्तम लोचन श्रेष्ठ जुं सिंहधवाका लायकुया जवं खवं तयो तःगु राष्ट्रिय कला संग्रहालय खपया हलिमय मरुगु ज्वःमरुगु सम्पदात ल्यंकः म्वाकः तय्ता फुक्क हे हज्याय् मः धायोदिल ।

राष्ट्रिय कला संग्रहालय खपया इतिहास स्वयगु न्ह्यकं खः धायोदिसे वयकलं संग्रहालयं खपया ऐतिहासिक महत्वता पिब्वयो च्वंगु खाँ काडः दिल ।



ज्या इवः सं राष्ट्रिय कला संग्रहालय खपया प्रमुख जयन्ती संग्रहालय पलिस्था यागुया इतिहास काडः दिसे राष्ट्रिय कला संग्रहालय खपय् अःधातुकला, चित्रकला, प्रस्तरकला व काष्ठकलाया २१०० गू कलात्मक वस्तु मुडः तःगु खाँ काडः दिल ।

पूर्ण खोप सुनिश्चिता खप दे काथं क्वः छित

असार १९ गते



खप नगरपालिकाता पूर्ण खोप सुनिश्चित पालिका दक क्वः छ्यूगु दः । खप नगरपालिकाया प्रमुख सुनिल प्रजापति जुं छगू ज्या इवः सं पूर्ण खोप सुनिश्चितताकाथं क्वः छिडः दिल ।

ज्या इवः सं वयकलं पूर्ण खोप सुनिश्चितता नपां स्वास्थ्य स्वयमसेविका व स्वास्थ्य कःमिपिन्ता थप जिम्मेवारी वगु खाँ ब्याकसे सरकारं प्रमाणित यागु खोपता फुक्कसिया पहुँच्य थ्यंक्य मगू खाँ बःबियो दिल ।

वयकलं कोभिड भवल्वय मनुया जीवनया लागिं चुनौति

नपां न्हूगु खोप दयकेगु मौका नं जूगु नपां खोपता वेवास्ता याय मज्यूगु खाँ कोभिडं स्यंगु खाँ नं काडः दिल ।

उपप्रमुख रजनी जोशीं स्वस्थपुस्ता ब्वलांकय्ता खोपया तःहांगु लाहा दैगु खाँ ब्याकसे स्वस्थ व सभ्य समाज दयकेता सकलसिया ग्वाहाली मदयक मगा धायोदिल ।

जनस्वास्थ्य कार्यालय भक्तपुरया प्रमुख अञ्जना खड्कां खोप सुनिश्चितता क्वः छियता ग्वाहालीयापुं सकलसिता सुभाय देछासे थ्वनपां भक्तपुरया प्यंगुतुं नगरपालिका पूर्ण खोप सुनिश्चित घोषणा जुगु खाँ काडः दिल ।

नपां जनस्वास्थ्य कार्यालय प्रमुख खड्कां खप नगरपालिकाया प्रमुख सुनिल प्रजापतिजु याता 'पूर्ण खोप सुनिश्चितता'या दसिपौ लःल्हाड द्यूगु खःसा प्रमुख प्रजापति जुं हिगुं तू वडाया वडाध्यक्ष जूपिन्ता पूर्ण खोप सुनिश्चितता दसिपौ लःल्हाडः दिल ।

ज्या इवःसं खप नगरपालिकाया प्रमुख प्रशासकीय अधिकृत वसन्त भट्टराई जुं लसकुस न्वचु तयो द्यूगु खःसा खोप फोकल व्यक्ति कमल केशरी राजचलं खप नगरपालिकाय नियमित खोप व पूर्णखोप सुनिश्चितता तथा दिगोपनाया ल्या पिब्वयो दिल ।



**खप नगरपालिकाता न्ह्याबलें सफा,
सुगधर तयगु सकल नगरवासीतयगु कर्तव्य खः ।**

अनुगमन

असार १९ गते

ख्वप नगरपालिका अनुगमन समितिया कजि राजकृष्ण गोराया न्ह्यलुवाय् व्यासीया लापसलय अनुगमन याडः दिल । ला तमपुसे, धुलं गय्कः, भुजिं नं भुंक तयो तः गुलि जालीं तपुयो व खँ या बाकस दय्क उकी दुनय तयोतय्ता सल्लाह बियो दिल ।

उगु अनुगमनं सानो व्यासी लापसः स्वन्हूया दुनय नवीकरण याय्ता, निकास थासय लाकय्ता, तुइगु एप्रोन फियता नपां लाः भुजिं नं भुंकः धुलं गय्क मतसिं जाली तयो वा खँ याय्गु बाकस दय्कः तय्ता सल्लाह बिल । अथेहे इन्द्रायणी मिटसपय् ला पालिगु ज्याभःत सफा याडः तय्ता, आंग, बाँ सफायाय् अःपुक टायल टिकय्ता व निकास व्यवस्थित याय्ता सल्लाह बिलसा वाराही अजिमा मिट सपय नं स्वन्हूया दुनय नवीकरण याय्ता, तुइगु एप्रोन, टायल टिकय मःगु, निकास थासय लाकय् मःगु व फ्रिजय स्यंगु ला तयो तःगु

वांछ्वयो बिल ।

भक्तपुर चिकेन हाउसय् २०७६/७७ निसैं नवीकरण मयागुलिं स्वन्हूया दुनय नवीकरण याडः मूल्यसूची तयो सफा याय्ता सल्लाह ब्यूगू खःसा न्यू नवदुर्गा मिटसपता सफा याय्ता, बालाखु गणेश कोल्डस्टोरता सफा याय्ता व एभरेष्ट चिकेन स्टोरता पसः व तालाजु नवीकरण याय्ता धःगु जुल ।

अनुगमन समितिया दुजः रोशन मैयौ सुवाल, ज्ञान बहादुर मानन्धर, ख्वप नगरपालिका स्पानिटेसन शाखाया वडा निरीक्षक रामकृष्ण प्रजापति, जिल्ला प्रशासन कार्यालय भक्तपुरया मालती पन्त, महानगरीय प्रहरी परिसरया प्रहरी सहायक निरीक्षक कमल कुमार श्रेष्ठ, राष्ट्रिय उपभोक्ता मञ्चया थापा उद्योग वाणिज्य संघया राजेश त्वानाबासु, घरेलु तथा साना उद्योग संघया सुमित्रा श्रेष्ठ पुं भःगु खः ।

ई काथंया न्हूगु पुस्ता ब्वलांकय्गु जिम्मेवारी ब्वनय्कुथियाय्गु

असार २० गते



नेपाल मजदुर किसान पार्टीया नायो भाजु नारायणमान बिजुक्छेँ (रोहित) जुया पाहाँलय वागीश्वरी माध्यमिक विद्यालय पाखं २०८१ सालया एस.ई.ई. परीक्षाय तः लापुं ब्वनामिपिन्ता लसहानय् ज्या व लाँक्यनय्गु ज्या इवः सं वयकलं नेपाल विश्व व्यापार संघया दुजः जूसेलिं नेपाली ब्वनामिपुं विदेशय वानिगु अपलं दयो वगु नपां थुकी दुजः जूसानिसैं विदेशी संघ संस्थां छूतां म्वायकः नेपालय ब्वनयकुथि व कलेजत चाय्कः व्यापार याय दःगु अधिकार सुनिश्चिततां नेपालता घाटक जूगु खाँ ब्याकः दिल ।

नेमकिपां उकिया विरोध यासां शासक दलतय्गु अकर्मण्यतां संसदं उकिता अनुमोदन यागु खाँ व्याकसे वयकलं योग्य शिक्षकपिनी पाखं योग्यपुं ब्वनामिपुं ब्वलानिगु विश्वास प्वंकः दिल ।

नायोभाजु बिजुक्छेँ जुं ब्वनयकुथिया इलयनिसैं ब्वनामिपिन्ता भाय बांलाक स्यनय् मःगु नपां विदेशी भाय सय्के मः धायो ग्वाकय मःगु नपां एस. ई. ई. लिपा ब्वनामिपिन्ता छु ब्वनय्गु धाय्गु खाँ काडः लाँपु क्यनयमः धायोदिल ।



ईलं पर्वथेया ढवनामिपुं ढवलांकय्गु जिम्मा ढवनय् कुथियाय्गु खः धायोदिसे वयकलं ढवनामिपिन्ता इतिहास, भूगोल, राजनीति, नेपाल भाषा ढवनय्ता ग्वाकय मः धायोदिल ।

खवप नगरपालिकाया प्रमुख सुनिल प्रजापति जुं एस. ई. ई. तः लापुं ढवनामिपिन्ता लसहांसे भिन्तुना देछःसे ढवनय्कुथिया जग बल्लासा उच्च शिक्षा ढवनय्ता अःपुङ्गु खौं व्याकसे एस. ई. ई. उत्तीर्ण फुक्क ढवनामिपिन्ता ढवनय्ता मःगु फुक्क विषय खवप्य हे दःगु खौं व्याकसे नेपःया ढवनामिपुं विदेशय ढवौं वांसेलि नेपःया कलेज चाय्केता थाक्यो वगु खौं काडः दिल ।

वयकलं ढवनामिपिसं थःगु बिस्कं म्हासिइका पिढवयता थःगु तुतिखय दाडः अध्ययनशील जूय मःगु नपां थःगु शैक्षिक योग्यता व छौं जः पिनिगु आर्थिक अवस्था स्वयो विषय ल्ययो ढवनय्ता सल्लाह बियो दिल ।

ज्या इवः या अवस्था सभाया नायो नपा विद्यालय व्यवस्थापन समितिया नायो खवप नगरपालिका वडा नं ९

सच्छि व खुडछगूगु स्वप पौ, बःछि पौ(पाक्षिक)

या वडाध्यक्ष रविन्द्र ज्याखवःजुं विदेशी सम्बन्धनय् चाय्कः तःगु ढवनय्कुथि व कलेज तय्सं मखुगु संस्कार स्यनय् फः गुलि सचेत यासे नमुना ढवनय्कुथि काथं म्हासिइका पिढवयो वगु वागीश्वरीया ढवनामिपिसं वैगु दिनय नं ढवनय्कुथिया नां चवनिगु काथं उच्च शिक्षा ढवनय्ता भिन्तुना देछायोदिल ।

ज्या इवः सं विद्यालय व्यवस्थापन समितिया दुजःनपां प्लस टु या कजि ज्ञान सागर प्रजापतिजुं वागीश्वरीं ढवनामिपिन्ता पाठ्यक्रमजक ढवकिमखु थःगु तुतिखय दानय्गु नं स्यडः वगु खौं काडः दिल ।

एसईई तः लापुं ढवनामिपिसं उच्च शिक्षा ढवनय्ता विषय ल्ययगुलि बिचः याय मःगु खौं व्याकसे वयकलं वागीश्वरी दायें १ करोड स्वयो अपःया छात्रवृत्ति लःल्हाड वगु खौं काड दिल । वयकलं देशादेछिया ३५ टु सामुदायिक ढवनय्कुथि मध्ये वागीश्वरी गुगूगु थासय लाकय् फःगू गौरवया विषय खः धायोदिसे वागीश्वरी अः डाट्ट स्वयो अपः ढवनामिपुं ढवडः चवंगु खौं काडः दिल ।

वागीश्वरी मा.वि. या प्र.अ. कृष्ण प्रसाद कर्माचार्य शिक्षक व ढवनामिपिनिगु मंकः कुतलं एस. ई. ई. सं बांलागु लिचवः वगु खौं व्याकसे कन्हेया दिनय् नं अजः बांलाकः उच्च शिक्षा ढवनय्ता ग्वाकः दिल ।

ज्या इवः सं एस. ई. ई. चव जःपुं नेम्हा ढवनामिपुं ममता थापा व आशिष प्रजापतिपिसं ढवनय् कुथि थः ढवडा बलय्था अनुभव काडः दिल ।

ज्या इवःया मू पाहाँ बिजुक्छौं जुं व विशेष पाहाँ नगर प्रमुख प्रजापति जुं एस.ई.ई. तः लापुं ढवनामिपिन्ता 'स्वर्ण सिंह' मतिनाया चिं काथं लः ल्हाडः द्यगु खः ।

इनाप

खवप नगरपालिका पाखं पिथाड चवंगु स्वप पौ बः छि पौ खय् बांलागु चवसु त बियो ग्वाहली याड दिसँ । उगु रचनाया ल्य ज्या याड पारिश्रमिक बियगु खौं खवप नगरपालिकाया २०७७ श्रावण २६ गते चवंगु बैठकं क्वः छ्यगु खौं व्याक चवडा ।

सम्पादक
खवप पौ

शिक्षकपिनिगु मेहनतं ब्वनय्कुथि हज्याइगु

असार २० गते

खप नगरपालिकाया प्रमुख सुनिल प्रजापतिया मू पाहाँल्य् सरस्वती विद्यागृहपाखं एस. ई. ई. ब्यूपुं २०८१ या पुचः ता लसहना व लाँपु क्यनय्गु ज्या इवःसं लसः हांसे मतिनाया चिं लः ल्हाडः दिल ।

ज्या इवः सं वयकलं शिक्षकपिनिगु मेहनत व सेवा भावं ज्या सानय्गु भावनां ब्वनय्कुथि हज्याडः बांलाक यंकय् फैगु खाँ ब्याकसे सरस्वती विद्यागृहता अज बांलाक हज्याडः यंकय्ता न्ह्यलुवा जुयो च्वंपुं अज बांलाकः थाकुमचःसैं ज्या सानय् मः धायोदिसे खप नगरय् थुगुसी ९० प्रतिशत ब्वनामिपुं एस. ई. ई. उत्तीर्ण जूगु खाँ नपां फुक्क हे पास याकय्ता घ्वाडः

च्वडागु नपां सामुदायिक ब्वनय् कुथिता अभिभावक व स्थानीय जनताया विश्वास काय फैगु काथं शिक्षक पिसं ज्या सानय् मः धायो दिल ।

राज्यया अपलं लगानी जूगु सामुदायिक ब्वनय्कुथिया शैक्षिक गुणस्तर अज बांलाकय्ता कुतः याय् मःगु नपां ब्वनामिपिन्ता व्यवहारिक व नैतिक शिक्षा वियता ब्वनय्कुथिं बः याय्मः धायोदिल ।

खप नगरपालिकां गरिव व जेहेन्दार ब्वनामिपिन्ता छात्रवृत्ति व शैक्षिक ऋण थजगु ब्वनामिपिन्ता स्वयो ज्या इवः न्ह्याकः वयागु खाँ ब्याकसे वयकलं सामुदायिक व निजी ब्वनय्कुथिया दश्वी शैक्षिक भेद मदयकः हज्याड वयागु खाँ काडः दिल ।

फुक्क थासय कानुन विषय थुईकेमःगु खाँ ब्याकसे वयकलं खप नगरपालिका खपयसं शिक्षा, मानविकी, व्यवस्थापन, विज्ञान, कानून, नर्सिङ, इन्जिनियरिङ थजगु विषयत ब्वंकय्गु शैक्षिक संस्थात चाय्कः तःगु खाँ काडः दिल ।

संस्था लिपा थ्यंकः बांलाकः हज्याय्ता व्यवस्थापक, शिक्षक व विद्यार्थी अभिभावक पिनिगु मंकः कुतलं ज्या याय् मः गु खाँ ब्याक दिल ।

विद्यालय व्यवस्थापन समितिया नायो नपां खप नगरपालिका वडा नं. ९ या वडाध्यक्ष रबिन्द्र ज्याख्वं सरस्वती विद्यागृह हज्याय फःगुल्लि शिक्षक-शिक्षिकापिनिगु तः हांगु लाहा दःगु खाँ नपां राज्य बल्लाकय्ता सामुदायिक ब्वनय्कुथिया शैक्षिक स्तर बल्लाकय्मः धायोदिल । वयकलं ब्वनय्कुथि अः ४९४ म्हा



ब्वनामिपुं ब्वडः च्वंगु खाँ ब्याकसे थव स्वयो अपः ब्वनमिपुं ब्वनय्ता सकलसिया मेहनत मःगु खाँ ब्याकसे संस्था चाय्केता शिक्षक, व्यवस्थापन, ब्वनामिपुं, अभिभावक व स्थानीय जनताया उथिग्यंक लाहा दैगु खाँ ब्याकः दिल ।

ब्वनय्कुथिया प्र.अ. गनुराज राई जुं ब्वनय् कुथिया एस. ई. ई. या लिचवः सन्तोषजनक जूगु, ब्वनामिपिसं जिपिए अपः हयांजक बांलाइगु मखु व्यवहारिक जीवनय् सफल जुयमः धायोदिल ।

सामुदायिक विद्यालय समन्वय समितिया नायो ज्ञान सागर प्रजापति जुं शिक्षा, मानविकी, व्यवस्थापन थजगु विषयया महत्व काडः दिसे फूक्क विषयया उत्तिकं महत्व दैगु खाँ ब्वनामिपिन्ता थुइक, लाँपु क्यनय्मः धायोदिल । कमजोर ब्वनय्कुथित मेगु नपां स्वाडः यंकय्गु सरकारया नीति खोटा खः धायोदिसे वयकलं ब्वनामिपिसं थौं यागु मेहनतं कन्हे तुइजलां काइगु खाँ काडः दिल ।

सरस्वती विद्यालय शिक्षक अभिभावक संघया नायो माधव नारायण कोण्डां एस ई ई सं ९५ प्रतिशत ब्वनामिपुं पास जुगु गौरबया खाँ खः धायोदिसे अः एस.ई.ई. पास जूपिन्ता छु बिषय गना ब्वनय्गु धाय्गु लाँ क्यनय् मःधायो दिल ।

ज्या इवः सं एस ई. ई. परीक्षासं च्वः जः म्हा तपेन्द्र बुढां ब्वनय्कुथिं ब्वनामिपिनिगु तातुना पू वांकय्ता थानाया अनुभवी शिक्षक पिनिगु तः हांगु लाहा दः धायो दिल ।

ज्या इवः सं सरस्वती विद्यागृहसं हिगू तगिलय ब्वकिपुं शिक्षकपिन्ता वयकपिनिगु योगदानता हाडः हानय्ज्या यागु खः ।

कानून व्यवसायीपुं खःगु राजनीति व विचः सिद्वकः हज्यायमः

असार २१ गते



कानून अध्ययन समाज भक्तपुर जिल्ला समितिया, गवसालय शनिबार मुंगु ख्वप जिल्लाया कानून व्यवसायीपिनिगु भेलासं नेपाल मजदुर किसान पार्टीया केन्द्रीय दुजः नपां ख्वप नगरपालिकाया प्रमुख सुनिल प्रजापति जुं कानून व्यवसायीपुं अध्ययनशील व विद्वान जुइगुलिं सही विचः व राजनीतिया पक्ष जुयमःगु खाँ काडः दिल ।

कानून अध्ययन समाजया संस्थापक नायो नपां अःयाय्म्हा सल्लाहकार प्रजापति जुं विचः हे मरुपुं ट्विचिंक मुडां छुं हे अर्थ मदैगुलिं अग्रगामी विचलं न्हाप व लिपा त्याक हे त्वः तिगु खाँ काडः दिल ।

वयकलं पूँजीवादी व्यवस्था तःमिपुं व शोसक वर्गया शासन व्यवस्था जुगुलिं सरकारं पूँजीपति वर्गया सञ्चालक समिति काथं जक ज्या सानिगु खाँ व्याकसे देशया शासक दल तय्सं जनताता भिं जुइगुकाथं संविधान अनुसार ऐन मदयकसिं च्वंगु अलय विदेशी पूँजी व दलाल पूँजीपति वर्गता भिं जुइगु ऐनत धमाधम दयकः च्वंगु खाँ कुलः, दिसे शासन व्यवस्था न्हाय्बल्लें वर्गीय जुइगु मार्क्सवादया मूल सिद्धान्त नेपालय नं धात्थें खय्कः जुयो वयो च्वंगु दः धायो दिल ।

वयकलं नेमकिपां देया संसद व सडकय् प्रखर प्रतिपक्षया भूमिका निर्वाह याडः वयो च्वंगु अलय संवैधान्तिक व वैचारिक संघर्ष जक देश व जनताता भिंजुइगु खाँ व्याक दिल । नपां पूँजीवादी व्यवस्थाया पलिसा पूँजीवादी व्यवस्था हे जुय मफूथें छगू पूँजीवादी पार्टीया पलेसा मेगु पूँजीवादी पार्टी जुयमफैगु अलय सरकारय् वानिपुं पार्टीत ह्यूसं पूँजीवादी व्यवस्थाय् उलि मपाइगु खाँ काडः दिल ।

वयकलं निर्वाचन धाय्गु शान्तिपूर्णकाथं वर्गशत्रुया मभिं मचःगु ज्या याता सःश्वकय्गु ज्या खः धायो दिसे मग्यासीं वैचारिक स्पष्टताया निंतिं निर्वाचन ल्वायमःगु सुभाब बियो दिल ।

भेलासं कानून अध्ययन समाज नेपाल केन्द्रीय समितिया नायो नपां अधिवक्ता राम प्रसाद प्रजापतिं शासक दल सम्बद्ध कानून व्यवसायी संगठनया अकर्मण्यता व भ्रष्टाचारयाडः देया न्याय क्षेत्र व न्यायपालिका हे बदनाम जुयोच्च्वंगु, कानून अध्ययन समाज नेपालं न्याय क्षेत्रय दःगु विकृति-विसंगाति व भ्रष्टाचारया विरुद्ध च्वतुइकः सःतयो वगु खाँ काडः दिल ।

मुंज्याया गवसाखलःया नायो नपां अधिवक्ता राजु कैतीं ज्यासाडः नैपुं वर्गया जनताया न्हयलुवा जुइगु कानून अध्ययन समाजया वैचारिक स्पष्टताया लागिं बारया निर्वाचनता छ्यलय् मः धायोदिल ।

भेलां अधिवक्ता गम्भीरमान ज्याख्व, या नायो सुई कानून अध्ययन समाज भक्तपुर जिल्ला अदालत बारं एकाइ समिति निः स्वान ।

भेलां साउन १० गते जुइगु नेपाल बार एसोसियन भक्तपुर जिल्ला अदालत शाखाया चुनावसं पूरै प्यानल उम्मेदवारी बियगु, चर्को उम्मेदवारी शुल्क म्हवचा याकय्गु माग यायां निर्वाचन समितिसं ज्ञापन पत्र बियगु व कानून व्यवसायीपिनिगु थीथी मागया खाँ तसे निर्वाचन समितिसं ज्ञापन-पत्र बियगु अलय कानून व्यवसायी पिनिगु थीथी मागया खाँ स्वापू दःगु निकायया ध्यान सालय्गु थजगु खाँ क्वः छ्यगु जिल्लाया नायो राजु कैती धायो दिल ।

हिंच्याकगु नगर सभा क्वचाल



असार ६ गते न्ह्याकगु खवप नगरपालिकाया हिंच्याकगु नगरसभा असार २३ गते क्वचाल । नगरसभाया नायो नपां खवप नगरपालिकाया प्रमुख सुनिल प्रजापतिया नायो सुई सोमवारय् च्वंगु बैठकं खवप नगरपालिकाया लेखा समितिया प्रतिवेदन २०८२ छपाम्हुतुं पारित यात । बैठकं न्यायिक समितिया प्रतिवेदन व नगरपालिकाया कर्मचारी पिनिगु तलबी प्रतिवेदन, खवप नगरपालिकाया वार्षिक खरिद योजनात नपां थी थी प्रस्तावत नं पारित यात ।

सभाध्यक्ष प्रजापति जुं हिंच्याकगु नगरसभा उलेज्याया मूपाहाँ, विशेष पाहाँ, मेपुं पाहाँपुं, बुद्धिजीबी, सञ्चारकःमि कर्मचारी, नगरबासी नपां नगरसभा तःलाक क्वचाय्केता ग्वाहाली याडः दयपुं सभासदजु पिन्ता सुभाय देछायो दिल ।

सभाया विशेष समयसं सभासद विष्णु केशरी दुवालं भ्रष्टाचार विरोधी आन्दोलन असार १९ व साउन २ गते या खाँ कुलः दिसे भ्रष्टाचारया विरोध याडः दिल । सभासद राम

सुन्दर वासी न्याकी देगः मथां दानय धुंकय्ता म क्वः, बजेट मथां छखय् लिङ्के मःगु, नपां वाउँक तयता दक्ष जनशक्ति छ्यलय् मःगु, सभासद गङ्गालक्ष्मी बमनुं भक्तपुर अस्पताल, भक्तपुर क्यान्सर अस्पतालया पार्किङ व्यवस्थापन याय मःगु व प्रदूषण याडगु उद्योगत ल्हयकेता पूर्व तयारी यायमःगु, सभासद मञ्जु मैयाँ लाखाजु शिक्षण पेसाता मन ह्वयकः ज्यासांकय् मःगु नपां मिसातय्ता प्रविधि मैत्री याय्ता मः काथं तालिम बियमःगु, सभासद हेरा ख्याजुं खौँ खुसी सफा याय मःगु नपां पी आइडीया उपचार पुखु दयकेगु ज्या मथां सिंध्यके बियता कुत याय मःगु, सभासद कृष्ण नारायण दुमहं नगरकोटया लाँ मथां सिंध्यके बियमःगु व कमल बिनायक आवास योजनाय् त्वनय्गु नाः या व्यवस्था याय् मःगु, सभासद सिद्धिराम अवलं कलाकार अरनिकोया खाँ कुल दिसे अरनिको सभाभवन मथां सिंध्यके मःगु खाँ तयो द्यगु खः ।

सभासद इन्द्रबहादुर प्याथं सहकारी संस्थातय्ता सचेत याय मःगु नपां खवप नगरपालिका वडा नं ९ या पर्यटन सूचना केन्द्र हकनं चाय्के मःगु सभासद श्याम सुन्दर मातां नं नगर प्रहरीत बांलाकः छ्यलय् मःगु, सहकारीया खराब ऋण व्यवस्थित याय मःगु, ल्वहँहिति या तिङः च्वंगु निकास चाय्के मःगु सभासद नारायण प्रसाद त्वानाबासुं गाजाया नरसंहार, निजामती सेवा सम्बन्धीया विधेयकय् च्वंगु कुलिङ अफ पिरियड, चोभार गल्ली (न्हसिकाप) देसि सः व्यवस्थाया खाँ कुलः दिल । सभासद गोबिन्द दुवालं भ्रष्टाचार विरोधी आन्दोलनया खाँ कुल दिसे मः क्वः सः हयगुलि बिचः याय्मः धायोदिल ।

खवप नगरपालिका वडा नं. ९ या वडाध्यक्ष रविन्द्र ज्याख्वं खवप नगरपालिकाया हिंच्याकगु नगर सभाया बःचा हाकलं प्रतिवेदन पिब्वयो द्यगु खः ।



एस ई ई तः लापुं कासमिपिन्ता लसहना

असार २५ गते

खप नगरपालिका युवा तथा खेलकुद समितिया गवसालय खप नगरपालिका दुनयँया कासा सयकामि जुयो च्वंपुं एस.ई.ई. तःलापुं कासामिपिन्ता लसहना नपां लापुं क्यनय्गु ज्या इवः सं न्वचु तयो दिसे खप नगरपालिका प्रमुख सुनिल प्रजापति जुं उम्हा कासामिपिन्ता स्वमः क्वखायकः लसहनांसे कासामिपिसं कासाखय् मेहनत या थें थःगु अध्ययनय नं मेहनत याय्म, धायोदिल ।

वयकलं एस.ई.ई. लिपा थः ता मंदगु व देशता मःगु विषय ब्वनयता सलाह बियो दिसे न्ह्यागु विषय ब्वसां उगु विषयया विशेषज्ञता कायो ब्वनय् मः धायो दिसे खप नगरपालिकां कासामिपिन्ता शिक्षाखय् न हछ्याय्गु तातुडः छात्रवृत्तिया व्यवस्था याडः वयागु खाँ व्याकसे देशां देछिया शैक्षिक गन्तब्य काथं हज्याडः वगु खप देता ब्वनयकुथि व कलेजय हे ब्वनयता सुभाह बियो दिल ।

शिक्षा क्षेत्रया विकासया निंतिं थःगु हे लाय छ्यलः कलेजत चायकः न्ह्याकगु न्हापांगु स्थानीय तह खप नगरपालिका खः धायोदिसे वयकलं अः खप नगरपालिकाया अनुभव देशां देछिया नगरपालिकाया लागिं नमुना जुयो च्वंगु खाँ व्याकः दिल ।

ज्या इवःसं वडा नं. १० या वडाध्यक्ष लक्ष्मी प्रसाद हयोंमिखां ब्वनामिपिसं उच्च शिक्षा ब्वनय्गुलिं नं बिचः यायमःगु खाँ व्याकसे अध्ययनशील कासामिपिसं देश विदेशय् नं मौका



दै धायो दिल ।

गवसाखलया कजि नपां खप नगरपालिका वडा नं. १ या वडाध्यक्ष श्यामकृष्ण खत्री खप नगरपालिकां दायें दायें पतिकं कासा हछ्याय्ता बजेट ताडः वयागु खाँ व्याकसे कासामिपिसं मेहनत याडः बांलागु लिचवः हयगुलि बिचः याय्मः धायो दिल ।

ज्या इवःसं गवसाखलया दुजः नपां खप नगरपालिका कार्यपालिकाया दुजः सुनिता अवालं खप नगरपालिकां दायें दायें पतिकं ब्वनयकुथि व्यागु कासाया धिधिबल्ला याडः ब्वनयकुथिया इलय निसें कासाखय् मन क्वसाय्केगु काथं ज्या याडः वगु खाँ व्याकलसा समितिया दुजः रञ्जना त्वातीं नं लसहाडः दिल ।

जिल्ला सहकारी संघया निःस्वाना दिं

असार २६ गते



खप नगरपालिकाया प्रमुख सुनिल प्रजापतिया मू पाहाँल्य जिल्ला सहकारी संघ लि. भक्तपुरया ४७ कगु पलिस्थादिं या ज्या इवः उलेज्या यासे वयकलं सहकारी थःपुं दुक्त पिन्ता थःगु तुतिखय् दनय् फयकः बियमःगु खाँ काड दिसे वचत व ऋण सहकारी तय्सं जनताया सामुहिक भिं याय्या लागि आदर निकेतन, स्वास्थ्य केन्द्र, शैक्षिक ऋणया व्यवस्थात याय्मः धायो दिल ।

बैंक, फाइनान्स कम्पनी तय्सं समस्या ब्यूगुलिं सहकारी संस्थान चाय्कगु खाँ काडः दिसे वयकलं समुदायया लिधंसाय सहकारी संस्थातय्सं दुजःपिनिगु मंकलं भिं याय्गु मतिं बांलागु ज्या

सच्छि व खुडछगूगु खवप पौ. बःछि पौ(पाक्षिक)

याड, वगु खाँ काडः दिसे सहकारी न्ह्याकः च्वंपिसं जनताया धेबा सहकारीया सिद्धान्तया अखः घर जग्गाखय् लाय छ्यलिगु, करोडौया बैंक व्यालेन्स तैगु, गाडी गयो जुइगु थजगु अनियमित ज्यात याडः जुइगु ज्याखं सहकारी संस्थात न्हिया न्हिथं बदनाम जुजुं वगु खाँ काडः दिल ।

सहकारी संस्थातय्सं थःपुं दुजः पिन्ता लाहातय ज्या दैगु कृषिया तालिम, डकःमि सिँकःमि, मोबाइल ल्हवनय्गु, मोटरसाइकल ल्हवनय्गु तजगु तालिम बियो च्वनय् मःगु खाँ नपां वयकलं सरकारया न्ह्यलुवा जुइपुं नेतात गतिमलातलय् दे बांमलाइगु खाँ काडः दिल ।

ज्या इवःया सभायानायो जिल्ला सहकारी संघ लि. भक्तपुरया नायो धुबबहादुर रायमाझी संस्था पलिस्था छाय याय माला धाय्गु खाँ ब्याकसे संघं किसान तय्ता मःगु सःइड बियगु

ज्या याडः वगु खाँ काडः दिल ।

भक्तपुर जिल्ला बचत तथा ऋण सहकारी संस्था लि. या नायो कृष्ण गोबिन्द लाखाजुं जिल्ला सहकारी संघ लि. देया जेठा सहकारी संघ काथं दःगु खाँ ब्याकसे सहकारीता नियन्त्रण याइगु निकाय मः धायोदिसे अथेनं बैंकता पोस याय्गु ज्या धःसा याय् मज्यू धायोदिल ।

ज्या इवः सं राष्ट्रिय सहकारी महासंघ लि. या सञ्चालक टेक प्रसाद चौलागाई, जिल्ला कृषि सहकारी संघ लि.या नायो सनिस लागेजु, राष्ट्रिय सहकारी महासंघ लि. या सञ्चालक धुवराज बिष्ट नं न्वचु तयो द्यूगु खः ।

ज्या इवःसं संघया सञ्चालक दुजः नपां शिक्षा समितिया कजि सुलोचना दुवालं लसकुस न्वचु तयो द्यूगु खः ।

अनुगमन तथा निरीक्षण

असार २७ गते

जिल्ला न्यायाधिश विश्व नाथ भट्टराईया न्ह्यलुवाय् जिल्ला अदालतया प्रतिनिधिपिनिपाखं खवप नगरपालिका न्याय समितिपाखं याडः वगु ज्याया अनुगमन व निरीक्षण याडः दिल । उगु स्वः वयगु ज्या इवःलय जिल्ला न्यायाधिश भट्टराई न्ह्यलुवाया पुचलं खवप नगरपालिकाया प्रमुख सुनिल प्रजापति जु याता नपा लाडः दिसे न्याय प्रणालीसं खानय दःगु समस्यात, न्यायिक समितिं सम्पादन यागु ज्याया खायँ छलफल याडः दिल ।

उगु ज्या इवल्य भःपुं जिल्ला अदालतया प्रतिनिधिपिसं खवप नगरपालिका न्यायिक समितिपाखं सम्पादन जुगु उजुरी निवेदनया मिसिलत अध्ययन याडः मःकाथंया राय सुभाबत ब्यूगु खः । खवप नगरपालिकां न्यायिक क्षेत्रय अदालतं याइगु पहलं हे व्यवस्थित याडः तथ्याड्क (ल्या) तयो तःगु खाँ प्रतिनिधिपिसं धायो दिल ।



संविधानं दायँ दायँ पतिकं न्यायिक समितिया अनुगमन व निरीक्षण याडः उकिया प्रतिवेदन नपां दयकः स्वापु दःगु निकायसं बुझय याय मःगु कानुनी व संवैधानिक व्यवस्था याडः तःगु खः ।



उलेज्या

असार २८ गते

खवप नगरपालिका वडा नं ८ या हामा देव देगः दानय्गु ज्या क्वचाय्क नगर प्रमुख सुनिल प्रजापति जु पाखं उलेज्या जुगु जुल ।

खवप नगरपालिकां कला संस्कृति व सम्पदात ल्यंकः, म्वाकः, भिंकः तय्गु इवल्य न्हाड वानय्तांगु देगः, फल्चा, ल्हँहिनि थजगु अमुल्य सम्पदात ल्हवनय्गु इवल्य थुगु हामा देव देगः नं ल्हंगु जुल ।

સ્વપ ઇન્જિનિયરિંગ છાત્રવૃત્તિ વિતરણ

અસાર ૨૭ ગતે



સ્વપ નગરપાલિકા પાઠ્યક: ત:ગુ સ્વપ ઇન્જિનિયરિંગ સ્નાતક તગિંલય ધર્ના જુયો અ: નેગુ સ્વગુ વ પ્યંગુ તગિંલય બ્વડ: ચ્વંપુ બ્વનામિપિન્તા કલેજ સચ્ચાલક સમિતિયા નાયો નપાં સ્વપ નગરપાલિકાયા પ્રમુખ સુનિલ પ્રજાપતિ જું છાત્રવૃત્તિ રકમ ઇડ: બ્યૂસે કલેજ મદિક્ક બ્વનામિપિન્તા બ્યૂ બ્યૂ વગુ છાત્રવૃત્તિ અપલં બ્વનામિપિન્તા ચ્વય થ્યંક બ્વનયતા ગ્વાહાલી જૂગુ ખાં કાડ: દિલ ।

સ્વપ નગરપાલિકાપાઠ્યક: તગુ કલેજ બ્વનામિપિન્તા પ્રોત્સાહન કાથં દાય ૪ કરોડ ૨૫ લાખ ક્વતિયા છાત્રવૃત્તિ બ્યૂ બ્યૂ વગુ ખાં બ્યાકસે વયકલં છાત્રવૃત્તિ નપાં નગરપાલિકાં સહુલિયત દરં શૈક્ષિક ઋણ બિયો વયાગુ, દેયાલાગિ સક્ષમપું યોગ્ય નાગરિકપું બ્વલાંકયુગુ તાતુડ: સ્વપ નગરપાલિકાં થી થી વિષયયા ન્યુગુ કલેજત ચાયક, તયાગુ નપા દેયા વિષય ચિન્તન યાડપું ન્હૂગુ પુસ્તા બ્વલાંકયુ મ:ગુ ખાં નં કાડ: દિલ ।

કન્હેયા દે લ્યાસે લ્યામ્હેપિનિગુ લાહાતય લાડગુલિં નેપ: યા અપલં નાગરિકત વિદેશય વાનિગુ અપ: જુયો વગુલિં દે હજ્યાકયતા થાકુડગુ ખાં નં બ્યાકસે વયકલં સરકારં આ.વ. ૨૦૮૨/૮૩ યા બજેટય વૈગુનેદાયા દુનયેં જાકી વ દાલખય આત્મનિર્ભર જુયગુ ખાં ન્યનય બલય બાંલાસાં તથ્યયા લિધંસાથ મલાગુ ખાં કુલ દિસે સ્વીદા હાં જાકી પિનય દેશય છ્વડગુ દેશં અ:ન્યાડ: હ્ય મ:ગુ અવસ્થાય થ્યંગુ ખાં બ્યાકસે વયકલં (કૃષિ) બુંજ્યાયા લાગિં મ:ગુ સ:કારખાના ધીગુ દેશય હે ચાયકે મફૂગુ, કૃષકપિન્તા આધુનિક ઉત્પાદન પ્રણાલીયા તાલિમ બિયમ:ગુ ખાં બ્યાકદિલ ।

વયકલં સરકારં ચાકુક માકુક ખાં જક લ્હાડ: નીતિ વ કાર્યક્રમ ન્યાકયુગુ સ્વયો તથ્યયા લિધંસાય યોજના હજ્યાય મ: ધાયોદિસે ચિનિયોં બૈજ્ઞાનિક યુઆન લડપિડં જુ સન ૧૯૭૦ યા દશકય ન્હાંગુ હાઇબ્રિડ વાત પિકાયો કરોડોં જનતાતા પિત્યા વ ગરિબી થાતા હ:ગુ ખાં કાડ: દિલ ।

વયકલં સ્વાસ્થ્ય બિમાયા લાગિં છલ્લયલિડકગુ બજેટ મગાગુલિં થુગુ આ.વ. સં થી થી અસ્પતાલયા અજ નં ૨૬ અર્બ વિમાયા ધેબા કાય માનિગુ ખાં કુલ: દિસે થોં કન્હેં પત્રપત્રિકા વયો ચ્વંગુ ભષ્ટાચારયા બુખાંસં પ્રાવિધિક ઇન્જિનિયરપું નપાં મિલય જુયો ન:ગુ ખાં પ્યાહાં વયો ચ્વંગુ ખાં બ્યાકસે મજ્યુગુ જ્યા સાડ: ધેબા કમે યાયુગુ મખુ દેશ વ સમાજયા સેવાયા નિતિં જ્યા સાનયતા સુભાવ બિયો દિલ ।

સ્વપ નગરપાલિકા વડા નં ૯ યા વડાધ્યક્ષ નપાં છાત્રવૃત્તિ સિફારિસ સમિતિયા કજિ રબિન્દ્ર જ્યાખં છાત્રવૃત્તિ ક:પું બ્વનામિપિન્તા લસહાંસે સ્વપ કલેજ અફ ઇન્જિનિયરિંગનપાંયા કલેજત સ્થાનીય સરકાર વ નગરબાસી જનતાયા કરં ચાયક: ત:ગુ ગૈર નાફામૂલક સરકારી કલેજ સ: ધાયો દિસે સ્વપ સર્કલ દુનયયા કલેજ વ મેગુકલેજ ગુલિપા ધાયગુ ખાં બ્યાકસે થુગુ કલેજત બ્વનામિપું વ અભિભાવક પિનિગુ વિશ્વાસ ત્યાક: વયો ચ્વંગુ ખાં બ્યાક દિલ । વયકલં કલેજં આર્થિક રૂપં કમજોર વ જેહેન્દાર બ્વનામિપિન્તા છાત્રવૃત્તિ બિયો વયાગુ ખાં બ્યાકસે બ્વનામિપિસં દેશ વ જનતાયા ધિં જુડગુ જ્યા યાયમ: ધાયોદિલ ।

જ્યા ઇવ: સં કલેજયા પ્રાચાર્ય ઈ. સુનિલ દુવાલં ધેબા મતા ધાય મ્વાયક: ગરિબ વ જેહેન્દાર બ્વનામિપિન્તા છાત્રવૃત્તિ બિયો વગુ નપાં સ્વપયા બ્વનામિપિસં જ્યા સાનયગુલિ ઉચ્ચ નૈતિકતા વ હિમાનદારિતા લ્યંક: જ્યા સાડ: વગુ ખાં નપાં છાત્રવૃત્તિયા ધેબા સ: થાય છલ્લયલિડક સુભાવ બિયો દિલ ।

જ્યા ઇવ: સં લેખા શાખા પ્રમુખ કાજિ બહાદુર પચ્ચં નં ન્વચુ તયો દ્યુગુ સ: નેગુ, સ્વંગુ વ પ્યંગુ તગિંલય બ્વડ: ચ્વંપું ૫૯ મ્હા બ્વનામિપિન્તા ૨૮ લાખ ૬૪ હજાર ૬૫૮ તકાતિયા છાત્રવૃત્તિ રકમ ઇડ: બ્યૂગુ જુલ ।



डेंगु सचेतना ज्या इवः

असार २८ गते

खप नगरपालिका वडा नं ७ या ग्वसालय शनिवार इनाचो, वाँचुत्व, खँचा, हनुमानघाट, चोर्चा व गोमारी, याताय् डेड्गु ल्वय मपुंकः मजुइक, पाडः तय्ता नेहूया सचेतना ज्याली नपां पाँती च्वनिगु थाय मालः नष्ट याय्गु ज्या इवः थी थी सहकारी संस्था, ब्वनय कुथि, सामाजिक संघ संस्था, स्वयंसेविका वडाबासी, कर्मचारी, जनप्रतिनिधिपुं भायो जुगु उगु ज्या इवः या सभा गोमाही व जगाती सं जुल ।

सभासं वडा नं ७ या वडाध्यक्ष उकेश कवां जुं पाँती डाडः डेड्गु ल्वय जुइगुलिं सचेत जुय मःगु नपां कोरोना ल्वचं नं मथिइक जुय मःगु सल्लाह बियो दिल ।

ज्या इवःसं वडाया दुजः पुं हेरा ख्याजु, हरिरत्न गोर्खाली, व रञ्जना त्वातीपिसं खप देता यचुक पिचुक बांलाक तय्ता भी न्ह्यलुवापिसं सुचुकुचु ज्या इवः न्ह्याक वांगु खाँ कुल दिल ।

अथेहे वाइज ल्याण्ड स्कूलया प्रिन्सिपल आशा कुमार चिक्बञ्जार, रुद्र नारायण लाखा, राजेश कुस्मा, प्रेरणा तपोल, साजन कसपाल, प्रकाश गोसाईं व नारायण प्रसाद कवां जु पिसं डेड्गु ल्वय पानय्गु व थुकिं गथे मथिइक जुयगु धाय्गु खाँ काडः दिल ।

शुक्रवार वाँचुत्वः, खँचा, हनुमानघाट, चोर्चा, भौरबही, व इनाचोय् प्रचार प्रसार याडः जुगु सभासं वडाध्यक्ष उकेश कवां, हेरा ख्याजु, आस्था सुवाल, रञ्जना त्वाती, रुद्र नारायण लाखा, राजेश कुस्मा, प्रेरणा तपोलजु पिसं नं थगु थासय् थमनं हे सुचुकुचु याडः ल्वचं मकयकः च्वनय्ता इनाप याडः दिल ।

अथेहे खप नगरपालिका वडा नं ६ या ग्वसालय वडाया जनप्रतिनिधि महिला स्वास्थ्य स्वयंसेविका, कर्मचारी, ब्वनामिपुं, सहकारी संस्था, खेलकुद समिति व वडाबासीपुं मुडः बाजा गाजा



नपां डेड्गु ल्वयया बारे जनसचेतना ज्याली शनिवार जुल ।

उगु ज्या इवःसं वडा नं. ६ या वडाध्यक्ष हरिराम सुवालं डेड्गु मजुइकेता पानयता थी थी ज्या इवःत जुयो च्वंगु खाँ ब्याकसे थःगु थाय् थमनं हे सुचुकुचु याडः ध्वगिइगु व ध्वमगिइगु फोहर छँ नं हे छख्य लिइकः फोहरथासय् लाकय्ता ग्वाहाली याडः दिसँ धायो इनाप यासे डेड्गु ल्वय जुलकी यक्व ज्वरो वइगु, लाभि व जोर्नीत स्याइगु, जिवय ह्याउँगु कैचा कैचा वइगु, वाकी वाकी वैगु, बान्ता जुइगु थजगु लक्षण क्यनिगु खाँ नपां पाँती डाडः थुगु ल्वय जुइगुलिं पाँती मदय्केता नाः मुंकय् मबियगु व पाँती सीइगु वास ह्वलय् मःगु खाँ काडः दिल ।

कार्यपालिकाया दुजः रोशन मैयां सुवालं खप नगरपालिकां शिक्षा, स्वास्थ्य, सफाइता लाय छ्यलः वयो च्वंगु खाँ ब्याकसे फोहर यातकी पाँती दैगुलि इलय् हे सुचुकुचु याडः यचुपिचुक तय्गु सकल नागरिकया कर्तब्य खः धायो दिल ।

वडाया दुजः सिद्धिराम अवालं त्वालय् त्वालय् मुंकः थजगु खाँ काडः डेड्गु ल्वय म्हवचा याय् फै धायो दिल ।

लघु उद्यमिपिन्ता उपयुक्त प्रविधि लःल्हात

असार २९ गते

खप नगरपालिकां लघु उद्यमिपिनिगु व्यवसाय धिसिला कय्ता थौं प्रविधि लःल्हासे नगर प्रमुख सुनिल प्रजापति जुं खप नगरपालिकां हामा थें जुयो नगरबासीपिन्ता मः काथंया लाहातय ज्या दैगु तालिमत ब्यू ब्यू थःगु तुतिखय दानय् फय्केगु कुतः याडः वगु खाँ काडः दिल ।

वयकलं, ज्यायाता हाडः ज्यासानिपिन्ता माया याडः हज्यायगु नीति काथं नगरपालिकां फुक्क पेशा व्यवसायता उत्तिग्यकः साथ व ग्वाहाली याडः वगु खाँ ब्याकसे व्यवसायीपुं थःगु ज्याखय् मन क्वसाय्क हज्याय फःसा तःलाइगु खाँ नं काडः दिल ।

ब्वनयकुथिया शिक्षानपां ल्यासे ल्याम्होपुं, ब्वनामिपुं व मिसामस्तय्ता लाहातय ज्या बियगु तातुडः नगरपालिकां अपलं

तालिमत बिय धुंगु खाँ कुल दिसे वयकलं दांकः भिंक सेवा बियो स्वस्थ धिंधिबल्ला याडः हज्यायता उद्यमि व व्यवसायीपिन्ता मन च्वछायो दिल । नपां ज्या स्यडानीहे अज बुद्धि ज्या हछ्याय मः गु खाँ ब्याकसे वयकलं खप नगरपालिका दुनयँ स्थायी बसोबास याडः वपुं हिंखुदा निसें पीडादातकया ज्या मदयकः च्वपुं नपां धेबा मदयो लाय छ्यलय् मफयो च्वपुं अलय विपन्न ल्यासे ल्याम्होपिन्ता उद्यमशील याय्ता धितो जमानीखय् सहूलियतपूर्ण व्याज दरय धेबा त्याय बियता युवा उद्यमशीलता प्रवर्द्धन ऋण छ्यलय धुंगु खाँ नं ब्याकः दिल ।

खप नगरपालिकाया उप-प्रमुख रजनी जोशीं जि उद्यमशील जुहे जुय धाय्गु अठोट हे विकासया न्हांगु ताकी खः

धायो दिसे ज्यायाता माया याय्गु बानी दय्के मः धायोदिसे छेगु लकां सुय्गु ज्या नं मिसा तय्सं क्यंगु सक्रियतायाता च्वछःसे वयकलं ख्वप नगरपालिकां छम्हा नागरिकता छगू सीप (ज्या) या अवधारणा काथं लाहातय् ज्या दैगु तालिमत ब्यू ब्यू वयागु खाँ काडः दिल ।

कार्यपालिकाया दुजः रोशन मैयाँ सुवाल नं न्वचु तयो द्यूगु उगु ज्या इवःसं नेम्हा प्रशिक्षार्थीपुं रामकृष्ण सुवाल व नारायण देवी दुवाल नं तालिमया खायँ थःगु अनुभव काडः दिल ।



चिनाखँ ब्वनय्गु व च्वय्गु धिंधिं बल्ला

असार २९ गते



भानु जयन्तिया लसताय ख्वप नगरपालिका वडा नं. १ या ग्वसालय १ वडा ब्यागु ब्वनयकुथितय दशवी कविता च्वज्या नपां ब्वनय् ज्याया धिंधिंबल्ला सं तः लापुं ब्वनामिपिन्ता ख्वप नगरपालिकाया प्रमुख सुनिल प्रजापति जुं सिरपा लःल्हाड दिसे वयकलं साहित्यिक रचनात सकसिनं थुइगु काथं सरल व सहज जुयमःगु खाँ ब्याकसे जनताया नुगः सः पिज्वइगु जनताया साहित्य थौ या इलय मदयक मगा धायोदिल ।

ब्वनामिपिन्ता साहित्यकार पिनिगु जीवनी ब्वनयता बःयाडः दिसे वयकलं साहित्यकार पिनिगु बिचः बन्दुकया गोली स्वयो बल्लाइगु खाँ ब्याकसे, साहित्यया छगू छगू खाँग्वलय समाजया सेवा भाव, देश प्रेम नपां ह्यूपाया मति दयमः धायो दिसे छुं नं ज्याखय् तःलाक हज्याय्गु खःसा उगु ज्याखय् दुग्यंकः ज्ञान दयमः धायोदिल ।

म्हागस व ई याता खःथाय् छ्यलय् फःसा ब्वनामिपुं तःलाडः हज्याय फैगु खाँ नपां वयकलं ब्वनामिपिन्ता समाजया भिंपुं व घ्वासा बिय फैपुं काथं हज्यायता नं लाँपु क्यडः दिल ।

ज्या इवःया सभाया नायो नपां ख्वप नगरपालिका वडा नं १ या वडाध्यक्ष श्याम कृष्ण खत्रीजुं साहित्य च्वयगुलि ब्वनामिपिनिगु मन क्वसाय्केगु तातुडः थुगु ज्या भूवः ग्वसः ग्वयागु खाँ ब्याकसे ब्वनामिपिन्ता साफूया ज्ञान नपां नपां अतिरिक्त

क्रियाकलापय नं च्वजाय्क तय्ता थजगु ज्याभूवःलं ग्वाहाली याइगुलिं ब्वनामिपिनिगु लिक्कुडः च्वंगु प्रतिभा चाय्कः हय्ता नं थुकिं ज्या याइगु विश्वास प्वंकः दिल ।

ल्य ज्यामिपु नेम्हा आशा कुमार चिकंबजार व सूर्यराम श्रेष्ठ जु पिसं ब्वनामिपिनिगु साहित्यं थःपिन्ता बांलागु लिच्वः लागु खाँ नपां धिंधिं बल्लां बां बांलागु चिनाखँ त पिब्वयगु मौका दःगु खाँ ब्याकसे साहित्य जुयता अपलं ब्वनयमःगु व चख्यंगु स्वपुकुनं स्वय मःगु, विषय वस्तु स्यल्लागु ज्ञान दयमःगु नपां सत्यया खाँ मग्यासे पिब्वयता घ्वासा बियो दिल ।

ज्याभूवःसं वडाया दुजः सूर्यप्रसाद श्रेष्ठ जुं धिंधिं बल्लाय दुथ्याक ब्वनयकुथि व ब्वनामिपिन्ता सुभाय देछःसे वडां वैगु दिनय नं थी थी ज्या याडः वानयगु बचं बियो दिल ।

ब्वनयकुथि ब्यागु चिनाखँया धिं धिं बल्लासं डागु तगिं तक मिजंमचात खय ज्ञान विजय आ. बि. या विपन खत्री न्हाप, गणेश मा.वि. या निकेश भुजेल ल्यू, सन्तति आ.वि.या दिपांशु श्रेष्ठ ल्यू या ल्यू लागु खः ।

मिसामस्त पाखथ सूर्यबिनायक स्कूलया बिहानी तामाड न्हाप, सनसाइनया पल्लबी कार्की ल्यू व सेरफ वलुडया विविध भट्टराई ल्यू या ल्यू लागु खः ।

खुगु, न्हय्गु व च्यागु तगिं पाखय मिजंत पाखय् गणेश मा.वि.या असरब मुहवत न्हाप, सन्तति आ.वि.या संसार अधिकारी ल्यू व ज्ञान बिजय आ.वि.या जीवन चौधरी ल्यू या ल्यू लागु खःसा मिसामचात पाखय ज्ञान विजय आ.वि.या जस्मिन क्षेत्री न्हाप, सन्तति स्कूलया एलिसा गौतम ल्यू व सूर्यबिनायक स्कूलया विनिसा भट्टराई ल्यू या ल्यू लागु खः । माध्यमिक तगिलय गणेश मा.वि.या प्रज्वल तामाड न्हाप व गणेश मा.बि.याय् हे स्मृति मानन्धर ल्यू या ल्यू लागु खः । धिंधिं बल्लाय ब्वति कःगु ब्वनयकुथि तयता नं मु पाहाँ नपां ख्वप नगरपालिकाया प्रमुख सुनिल प्रजापति जुं मतिना या चिं काथं सिरपा लःल्हाडः द्यूगु खः ।

नगर प्रमुख प्रजापतिनपां व्वनामिपुं

असार ३० गते



ख्वप नगरपालिकाया प्रमुख सुनिल प्रजापति नपां बासु माध्यामिक विद्यालयया च्यागू तगिया व्वनामिपुं नपालःवगु इवल्य नगर प्रमुख प्रजापति जुं ख्वप नगरपालिकां स्थानीय पाठ्यक्रम दयके मःगु या खौं काडः दिसे ख्वपया भाषा, लिपि, सम्पदा, भूगोल, राजनीतिया थी थी विषयसं व्वनामिपिन्ता चिच्याह्विलय निसें हे व्वंकः मे पिन्के मरुगु ज्ञानं जायकेगु तातुडः पाठ्यक्रम दयकः व्वंकय बियागु खौं काडः दिल ।

व्वनामिपिनिगु थःगु शैक्षिक जग बल्लाकयता थमनं ल्ययागु विषय मन क्वसायकः व्वनयगु नपां कण्ठ याडः व्वनयगु त्वःतक यंकय मःगु खौं व्याकसे थमनं व्वडागु व्वनयकुथि व व्वंकिपुं शिक्षकपिन्ता न्ह्याब्लें सम्मान याय मःगु खौं काडः दिसे वयकलं व्वनामिपिन्के

वागमती प्रदेशया स्वास्थ्यमन्त्री थापा मगर ख्वप अस्पतालया

असार ३१ गते

वागमती प्रदेशया स्वास्थ्य मन्त्री किरण थापा मगर १००गू शैय्याया ख्वप अस्पतालया निरीक्षण याडः दिसे अस्पतालया अवस्था व सेवा प्रवाहया खौं थुइकः दिल । वयकलं ख्वप नगरपालिकापाखं चायकः तःगु ख्वप अस्पताल व्यवस्थित यायां देशां देछिया बिरामी पिनिगु सेवा याडः वंगु नपां मः काथं ग्वाहाली यायगु बचं बियो दिसे ख्वप नगरपालिकां शिक्षा व स्वास्थ्यखय अःपुक सेवा याडः वगु नमूना नगरपालिका खः धायोदिसे थुकिता अज बांलाक यंकयता भी फुक्क छप्पा जुयो हज्याय मः गु खौं व्याकसे प्रदेश सरकार नागरिकपिन्ता अःपुकः भिंगु स्वास्थ्य सेवा बियता न्ह्याब्लें हज्याइ धायोदिल ।

ख्वप नगरपालिकाया प्रमुख सुनिल प्रजापति जुं वयक याता लसकुस याडः दिसे ख्वप नगरपालिकां ख्वप अस्पताल बाहेकं श्वासप्रश्वास पुनः स्थापना केन्द्र, जनस्वास्थ्य केन्द्र, सहरी स्वास्थ्य केन्द्र व आधारभूत स्वास्थ्य केन्द्र चायकः स्वास्थ्य सेवा बियो वयागु, मथां हे सिटिस्क्यान तयगु कुतः याडः च्वडागु खौं नपां सरकारं स्वास्थ्य बीमा उपचारया धेबा इलय हे मब्यूगुलिं अस्पतालता थाकुयो च्वंगु, शासक पिनिगु अदूरदर्शितां जनतां दुःख सियो च्वंगु खौं काडः दिल ।

ख्वप नगरपालिकां निःशुल्क अक्सिजन बियो वयो च्वंगु

साफूया ज्ञान नपां व्यवहारिक ज्ञान नं दयमः धायो दिल ।

ख्वप नगरपालिकां देकोचाय अरनिको सभाभवन् दयकः च्वंगु खौं व्याकसे वयकलं व्वनामिपिनिगु कल्पनाशीलतां न्हँ न्हँगु प्रबिधित विकास जुइगु खौं नपां सफलता-असफलता नेगूलिं ज्ञानकायो हज्यायता लौपु क्यडः दिसे थःगु समाज व देशप्रतिया माया व जिम्मेवारी बोधता न्ह्याब्लें हदाय तयो हज्याय मः धायो दिल ।

ज्या इवः खय वपुं व्वनामिपिसं ख्वप नगरपालिकां ख्वपय नगरय लकस बांलाकयता याडः वगु ज्या, फोहर थासय लाकिगु नीति, सहरी विकास योजना, ख्वप अस्पतालया सेवा प्रवाह, तरकारी बजार व्यवस्थापन, समाजवादी व पुँजीवादी व्यवस्था दथ्वीया पागु खौं, देसी सः कारखाना चायकेगु, ख्वपया दोहँसा वाय यंकयगु व बाली लयगु आन्दोलनया खौत न्यंगु जुल ।

ज्या इवःसं बासुया शिक्षक विष्णु प्रसाद दुमरं नं न्वचु तयो द्यगु खःसा नगर प्रमुख प्रजापति जुं बासु मा.वि. या सहायक प्र.अ. राजकुमार हयोमिखाता नगरपालिकाया पिथनात उपहार काथं लः ल्हाडः दिल ।

नपां म्हवचा धेबां भिंकः बांलाक शिक्षा बियगु तातुडः नेगू इन्जिनियरिड कलेज नपां न्हयगू कलेजत चायकः तयागु खौं नं काडः दिल ।

अनुगमनया इवल्य स्वास्थ्य मन्त्रालय स्वास्थ्य सचिव डा.सुमित्रा गौतमं वागमती प्रदेश अन्तरगत स्थानीय तहं न्ह्याकः च्वंगु ख्वप अस्पताल स्वय दयो लयता प्वंकसे ख्वप नगरपालिकाया शिक्षा व स्वास्थ्यया ज्या च्वछाय बहजु धायो दिल ।

ख्वप अस्पतालया नि.मेडिकल डाइरेक्टरं ख्वप अस्पतालया तथ्याङ्क नपांया प्रस्तुति क्यडः दिसे २०३० सालय जनस्वास्थ्य सेवा केन्द्र पाखं चायकगु उगु संस्था अः १०० गू शैय्याया अपताल यासे ३६५ दिन हे ओपिडि चायक सेवा बियो वगु खौं काडः दिल ।

अनुगमनय चिकित्सा सेवा शाखा प्रमुख डा. खगेश्वर गेलाल, आर्युवेद तथा वैकल्पिक चिकित्सालय काठमाडौंया शल्य चिकित्सक डा. रविन भुषाल, प्रदेश जनस्वास्थ्य प्रयोगशाला निर्देशक नारायणबहादुर कार्की, भक्तपुर अस्पतालया नि. अस्पताल निर्देशक डा. सुरेन्द्र भट्ट, वागमती प्रदेश स्वास्थ्य मन्त्रालयया विशेषज्ञ चिकित्सक डा. रन्जित कुमार माकजु, प्रदेश जनस्वास्थ्य प्रयोगशाला डा. श्वेता भ्ना, भक्तपुर अस्पतालया नर्सिड अधिकृत रोशनी श्रेष्ठ, वागमती प्रदेश स्वास्थ्य मन्त्रालयया नर्सिड अधिकृत स्वेता मानन्धरपुं नपां उपस्थित जगु खः ।

सम्पदा ल्यंकः, म्वाकः, मिंकः तय्गु इवल्य् हामा द्यो या देगः

(२०८२ असार २८ गते)



प्रदेश स्वास्थ्य मन्त्री थापा मगर ख्वप अस्पताल्य्

(२०८२ असार ३१ गते)





वागीश्वरीया एभ.ई.ई.त:लापिन्ता लक्षहना

असार २० गते



धुलिखेल नगरपालिकाय रूखप नगर प्रमुख प्रजापति जु

असार १७ गते